

MESYUARAT KEDUA, PENGGAL PERTAMA  
PARLIMEN KEEMPAT BELAS  
2018

**HARI KHAMIS : 25 OKTOBER 2018**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN FONG KUI LUN  
[BUKIT BINTANG]**

**TARIKH : 25 OKTOBER 2018 (KHAMIS)**

**SOALAN NO. 1**

Minta **MENTERI PERUMAHAN DAN KERAJAAN TEMPATAN** menyatakan apakah langkah yang Kementerian ambil untuk mengatasi masalah lambakan unit rumah yang tidak dapat dijual berikutan kegagalan para pembeli mendapatkan pinjaman perumahan daripada bank dan institusi kewangan.

## JAWAPAN

Yang di-Pertua,

1. Untuk makluman Yang Berhormat, masalah lambakan unit rumah yang tidak dijual ini dipengaruhi oleh beberapa faktor termasuklah **kegagalan para pembeli mendapatkan pinjaman perumahan daripada bank dan institusi kewangan**. Hasil kajian oleh Bank Negara Malaysia telah menyatakan hutang isi rumah kekal tinggi pada 83.9% daripada Keluaran Dalam Negara Kasar (KDNK) suku pertama 2018 walaupun telah menurun daripada 90% pada suku tahun sebelumnya. Tahap keberhutangan ini adalah lebih tinggi pada golongan berpendapatan rendah dan untuk isi rumah berpendapatan RM5,000 dan ke bawah. Majoriti daripada golongan berpendapatan rendah ini mempunyai penamparan kewangan (*financial buffer*) yang rendah kerana kelembapan kenaikan pendapatan sedangkan kos sara hidup semakin meningkat.
2. Untuk makluman Yang Berhormat juga, Kementerian Perumahan dan Kerajaan Tempatan (KPKT) telah mengadakan kerjasama dengan Bank Negara Malaysia untuk membangunkan satu skim pembiayaan yang lebih fleksibel bagi membantu golongan ini untuk meningkat kebolehcapaian bagi mendapatkan pembiayaan perumahan.
3. Berdasarkan maklumat daripada Kementerian Kewangan secara amnya, **bank hanya menolak permohonan pinjaman perumahan jika peminjam mempunyai tahap pinjaman yang tinggi, latar belakang dan pengurusan kredit yang lemah, dan tidak mempunyai dokumen pendapatan yang mencukupi** untuk menyokong keupayaan membayar balik pinjaman.
4. Dalam usaha untuk meningkatkan kadar pemilikan rumah di Malaysia, adalah **penting untuk memastikan tahap keberhutangan para peminjam berada di paras yang terkawal** dan rakyat tidak dibebani dengan hutang yang berlebihan. Untuk itu, Bank Negara Malaysia telah

memperkenalkan Garis Panduan Pemberian Pinjaman yang bertanggungjawab untuk memelihara kepentingan para peminjam agar meminjam mengikut kemampuan membayar balik pinjaman dalam tempoh yang ditetapkan. Di samping itu, institusi kewangan juga bertanggungjawab untuk memastikan kemampuan membayar balik peminjam dinilai secara menyeluruh.

5. Untuk makluman Ahli Yang Berhormat juga, kriteria kelayakan untuk membeli rumah kos rendah, kos sederhana rendah dan mampu milik perlu berpandukan penilaian kemampuan membayar balik hutang bakal peminjam. Segala obligasi bayaran balik hutang yang sedia ada, sama ada yang diperoleh daripada institusi perbankan dan institusi kewangan bukan bank, perlu diambil kira dalam penilaian kemampuan tersebut.
6. Untuk makluman Ahli Yang Berhormat juga, masalah lambakan unit rumah yang tidak dapat dijual turut dipengaruhi oleh ketiadaan data penawaran dan permintaan yang tepat. Terdapat pemaju-pemaju yang membangunkan projek perumahan dengan harga yang tidak sesuai dengan purata pendapatan di kawasan tersebut. Oleh yang demikian, KPKT dengan kerjasama Pusat Maklumat Harta Tanah Negara (NAPIC) sedang membangunkan sistem data bersepadu yang lebih terperinci yang dapat mengurangkan *mismatch* penawaran serta permintaan dalam pembangunan perumahan dan seterusnya dapat mengurangkan masalah lambakan unit rumah yang tidak dapat dijual.

Sekian, terima kasih.

**SOALAN NO. : 2**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN ABDUL LATIFF BIN ABDUL RAHMAN  
[ KUALA KRAI ]**

**TARIKH : 25 OKTOBER 2018**

**SOALAN NO.2**

**Tuan Abdul Latiff bin Abdul Rahman [ Kuala Krai ]** minta **MENTERI AIR, TANAH DAN SUMBER ASLI** menyatakan apakah jangkaan banjir pada penghujung tahun ini dan apakah langkah-langkah awal yang akan diambil terutama untuk kawasan Kuala Krai agar tragedi banjir 2014 tidak lagi berulang.

**JAWAPAN:**

Tuan Yang di-Pertua,

Merujuk kepada laporan Tinjauan Cuaca bagi tempoh Oktober 2018 hingga Mac 2019 oleh Jabatan Meteorologi Malaysia, Monsun Timur Laut dijangka berlaku pada November 2018 hingga Mac 2019. Hujan dijangkakan pada tahap yang normal (iaitu pada paras purata) dari November 2018 hingga Disember 2018 di Kelantan. Dengan jangkaan hujan ini, banjir di Negeri Kelantan dijangkakan pada tahap banjir normal tahunan.

Antara langkah-langkah awal yang akan diambil oleh Kementerian Air, Tanah Dan Sumber Asli melalui Jabatan Pengairan Dan Saliran (JPS) agar tragedi banjir 2014 di Kelantan tidak lagi berulang adalah :

- 1) Melaksanakan Program Ramalan dan Amaran Banjir Negara (PRAB) – PRAB Fasa 1 melibatkan 3 lembangan sungai iaitu Sungai Kelantan, Sungai Terengganu dan Sungai Pahang. Projek PRAB Fasa 1 masih dalam pelaksanaan dan sedang diuji jalan. PRAB membolehkan agensi penyelamat dan orang ramai membuat persediaan awal sebelum kajian banjir berlaku bagi mengurangkan risiko kerosakan harta benda dan kehilangan nyawa;
- 2) Membantu Kerajaan Negeri Kelantan meneruskan kerja-kerja pemuliharaan sungai dan kolam-kolam takungan banjir pada tahun 2018 dengan menyalurkan peruntukan kepada JPS Negeri Kelantan bagi melaksanakan kerja-kerja untuk mengurangkan risiko banjir; dan

- 3) Melaksanakan projek Pembangunan Lembangan Sungai Bersepadu (PLSB) Sungai Kelantan Fasa 1. Kerajaan telah meluluskan PLSB Sungai Kelantan Fasa 1 dalam RMKe-11 dengan siling kos projek sebanyak RM500 Juta. Projek ini dilaksanakan secara reka dan bina oleh kontraktor yang dilantik bermula pada 29 Januari 2018 di mana kerja-kerja rekabentuk terperinci sedang dilaksanakan.

Sekian, terima kasih.

**PEMBERITAHUAN PERTANYAAN**  
**MESYUARAT KEDUA, PENGGAL PERTAMA,**  
**PARLIMEN KEEMPAT BELAS,**  
**DEWAN RAKYAT**

**PERTANYAAN : LISAN**

**DARIPADA : TUAN OSCAR LING CHAI YEW [SIBU]**

**TARIKH : 25 OKTOBER 2018**

**SOALAN : 3**

**Tuan Oscar Ling Chai Yew [ SibU ]** minta **PERDANA MENTERI** menyatakan apakah jadual penyaluran elaun kepada pelajar universiti dalam negara yang ditaja biasiswa JPA (Jabatan Perkhidmatan Awam). Baru-baru ini, banyak aduan tentang kelewatan penyaluran elaun tersebut.



**JAWAPAN: YB DATUK LIEW VUI KEONG**

**MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, jadual pembayaran elaun JPA bagi pelajar tajaan JPA dalam negara dilaksanakan sebanyak dua (2) kali setahun pada setiap awal semester pengajian. Walau bagaimanapun, akan berlaku pembayaran tidak mengikut jadual asal yang ditetapkan sekiranya perkara-perkara berikut berlaku:-

- i. JPA telah menetapkan had pencapaian keputusan peperiksaan semester pelajar iaitu Purata Nilai Gred Kumulatif (PNGK) 3.00. Bagi pelajar yang mencapai PNGK 3.00, JPA akan membuat pembayaran elaun berdasarkan jadual bayaran yang telah ditetapkan. Sekiranya, pelajar yang tidak mencapai PNGK 3.00, mereka akan diletakkan di bawah pemantauan untuk mengenalpasti masalah yang dihadapi dan bayaran elaun hanya akan diproses sejurus isu yang berkaitan diselesaikan; dan
- ii. Kecuaian pelajar yang tidak mengemukakan keputusan peperiksaan pada tempoh yang ditetapkan atau mempunyai isu berkaitan penajaan seperti penangguhan, pelanjutan dan lain-lain masalah yang berkaitan.

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI HAJI IDRIS BIN JUSOH [ BESUT ]**

**TARIKH : 25 OKTOBER 2018 (KHAMIS)**

**SOALAN NO. 4**

Minta **MENTERI PENDIDIKAN** menyatakan adakah langkah Pentaksiran Purata Nilai Gred Kumulatif Bersepadu (iCGPA) tidak lagi diwajibkan di universiti-universiti awam (UA) dan jika tidak, bagaimana kaedah Kementerian atau UA untuk mentafsir kebolehan pelajar agar lebih holistik.

**JAWAPAN**

Tuan Yang di-Pertua,

Untuk makluman Ahli Yang Berhormat, Pentaksiran Purata Nilai Gred Kumulatif Bersepadu (iCGPA) tidak lagi diwajibkan di universiti awam (UA) dengan semangat memberi kebebasan dan autonomi kepada universiti, sama ada untuk meneruskan ataupun memberhentikan pelaksanaan program iCGPA di universiti masing-masing.

Keputusan ini dibuat setelah pihak KPM mengadakan beberapa sesi perkongsian dan pengkajian semula sistem iCGPA bersama kakitangan akademik dan pelajar daripada institusi yang sedang melaksanakan iCGPA, serta pihak industri dan badan profesional yang berkenaan. Walaupun UA tidak diwajibkan untuk menggunakan iCGPA, ia tidak membawa maksud bahawa tiada pengukuran penilaian ke atas pelajar. Pengukuran hasil pembelajaran masih dilaksanakan iaitu berdasarkan penilaian *Outcome Based Education (OBE)* bagi mengukur dan menilai tahap kemajuan pelajar.

Untuk makluman Yang Berhormat juga, KPM telah melaksanakan Bengkel Maklum Balas Pentaksiran Pelajar bersama semua UA dan mendapati majoriti UA mengambil keputusan untuk tidak melaksanakan iCGPA tetapi mereka menggunakan sistem masing-masing yang berpegang kepada asas OBE. Contohnya, *My Academic Integrated System (MyAIS)* oleh Universiti Malaysia Kelantan, *Student Profiling System (SPS)* oleh Universiti Malaysia Pahang, *Learning Outcome Report and Analysis* oleh Universiti Malaysia Sarawak dan Indeks

#### **Soalan No: 4**

HEBAT (*Holistic, Entrepreneurial, Balance, Articulate, Thinker*) oleh Universiti Sains Malaysia bagi pengukuran berasaskan OBE tersebut. Ini kerana Pengukuran Hasil Pembelajaran Program juga merupakan keperluan yang wajib bagi tujuan akreditasi oleh Agensi Kelayakan Malaysia dan badan profesional. Kementerian juga percaya dengan kebebasan yang diberikan, lebih banyak variasi penilaian holistik yang akan dibangunkan oleh UA masing-masing.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AKMAL NASRULLAH BIN MOHD.  
NASIR  
[JOHOR BAHRU]**

**TARIKH : 25 OKTOBER 2018 (KHAMIS)**

**SOALAN NO. 5**

Minta **MENTERI HAL EHWAL EKONOMI** menyatakan Paras Garis Kemiskinan (PGK) yang diguna pakai ketika ini sebagai rujukan penyaluran bantuan dan adakah Kerajaan komited untuk meningkatkan PGK selaras dengan kos sara hidup yang semakin tinggi.

**JAWAPAN**

Yang di-Pertua,

Untuk makluman Ahli Yang Berhormat, Pendapatan Garis Kemiskinan (PGK) ditakrifkan sebagai pendapatan isi rumah yang hanya mencukupi untuk membeli keperluan minimum yang terdiri daripada makanan dan bukan makanan. Pada masa kini, PGK yang digunakan untuk penyaluran bantuan adalah berdasarkan kepada perangkaan pada 2014 iaitu RM930 bagi Semenanjung Malaysia, RM1,170 bagi Sabah/ Wilayah Persekutuan Labuan dan RM990 bagi Sarawak. PGK terkini berdasarkan perangkaan pada 2016 akan digunakan dalam masa terdekat setelah dimuktamadkan. Penyaluran bantuan kepada isi rumah miskin adalah berdasarkan pendaftaran dalam sistem pengkalan data eKasih. Sistem ini sedang ditambah baik bagi memastikan penyampaian bantuan yang lebih efektif kepada kumpulan sasaran.

Kerajaan sememangnya komited untuk mengkaji semula PGK semasa supaya selaras dengan peningkatan kos sara hidup rakyat. Komitmen ini telah dinyatakan secara jelas dalam dokumen Kajian Separuh Penggal Rancangan Malaysia Kesebelas (KSP RMKe-11). Usaha ini akan dilaksanakan

dengan menambah baik model PGK yang mengambil kira perubahan corak penggunaan mengikut demografi dan geografi supaya lebih mencerminkan kos sara hidup sebenar rakyat.

Bagi melengkapi pengukuran kemiskinan berasaskan PGK, Kerajaan akan menggunakan satu kaedah pengukuran kemiskinan yang lebih menyeluruh iaitu Indeks Kemiskinan Pelbagai Dimensi (MPI). Selain pendapatan, MPI akan mengambil kira dimensi-dimensi lain iaitu pendidikan, kesihatan dan kualiti hidup dalam pengiraan indeks kemiskinan. Dengan penggunaan MPI ini, strategi dan pelan tindakan yang lebih menyeluruh akan dapat dilaksana bagi membasmi kemiskinan dan meningkatkan kesejahteraan rakyat.

Sekian, terima kasih.

25 Oktober 2018.

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI HAMZAH BIN ZAINUDIN**  
**[LARUT]**  
**TARIKH : 25 OKTOBER 2018 (KHAMIS)**

**SOALAN NO. 6**

**Y.B. DATO' SERI HAMZAH BIN ZAINUDIN [ LARUT ]** minta **MENTERI KEWANGAN** menyatakan apakah cadangan yang akan dilakukan oleh Kementerian berkenaan Syarikat Pelaburan Berkaitan Kerajaan (GLIC) dan Syarikat Berkaitan Kerajaan (GLC) dalam membantu dan menyokong pelaksanaan Agenda Bumiputera dan senaraikan nama syarikat-syarikat Bumiputera yang telah dibantu oleh GLIC dan GLC serta nilainya sepanjang pemerintahan Kerajaan baru ini.



**JAWAPAN**

Tuan Yang di-Pertua,

Untuk makluman Ahli Yang Berhormat, Kerajaan komited untuk meneruskan Reformasi Agenda Pemerkasaan Bumiputera, seiring dengan usaha untuk mempertingkatkan dan memperkasa kumpulan minoriti di negara ini. Hal ini terkandung dalam Kajian Separuh Penggal Rancangan Malaysia ke-11 (RMK-11), yang telah dibentangkan oleh Yang Amat Berhormat Perdana Menteri, baru-baru ini. Antara inisiatif yang akan diambil adalah perubahan minda yang positif dan penerapan nilai murni.

Ia termasuk pengukuhan keberkesanan institusi dan program, pemerkasaan modal insan dan pengukuhan pendidikan dan latihan bagi mendapatkan pekerjaan bergaji tinggi. Selain itu, Kerajaan kini sedang meneliti dengan serius 63 resolusi khusus yang telah dibangkitkan semasa Kongres Masa Depan Bumiputera dan Negara yang berlangsung pada 1 September. Kerajaan akan memastikan agenda pemerkasaan ekonomi Bumiputera dapat melahirkan generasi Bumiputera baharu yang berpegang teguh kepada nilai moral integriti serta sikap rajin berusaha.

Pada masa yang sama, Kerajaan turut mengiktiraf dan menyesuaikan semula program-program sedia ada yang menjurus ke arah matlamat untuk memperkasakan Agenda Bumiputera, termasuk Agenda Pemerkasaan Bumiputera (BEA) bagi Syarikat-syarikat Pelaburan Berkaitan Kerajaan (GLIC) dan Syarikat-syarikat Berkaitan Kerajaan (GLC). Program BEA bertujuan untuk meneruskan Agenda Bumiputera di beberapa GLIC dan GLC terbesar (G20) secara lebih berkesan dan profesional. Berdasarkan kepada kepentingan pembangunan negara dan perancangan program, pelaksanaan BEA kekal di bawah pemerintahan Kerajaan baharu, bukti kesungguhan Kerajaan untuk mengangkat martabat golongan Bumiputera di negara ini.

Di bawah program ini, setiap tahun, GLIC dan G20 telah diberi sasaran Indeks

## **NO SOALAN : 6**

Prestasi Utama (KPI) dalam tujuh bidang utama yang telah dikenal pasti dan pencapaian setiap syarikat seterusnya dilaporkan dalam bentuk kad laporan pencapaian BEA. KPI yang dimaksudkan adalah dalam bidang-bidang berikut:

- i. Program Pembangunan Vendor (PPV)
- ii. Pengukuhan rantai bekalan
- iii. Pengagihan khusus (carve-out)
- iv. Pembangunan modal insan (termasuk mengatasi isu kebolehpasaran graduan)
- v. Pengukuhan aset bukan kewangan
- vi. Pengukuhan pemilikan ekuiti dalam sektor korporat, dan
- vii. Penetapan sasaran pemerolehan untuk membantu syarikat-syarikat pembekal Bumiputera

Memandangkan pencapaian KPI BEA setiap syarikat adalah bagi tempoh satu tahun iaitu dari Januari sehingga Disember, laporan lengkap pencapaian KPI yang turut mengandungi senarai syarikat Bumiputera yang menerima manfaat daripada pelaksanaan BEA di GLC bagi tahun 2018 akan hanya dapat dikemukakan pada tahun berikutnya. Namun demikian, jumlah syarikat dan usahawan Bumiputera yang telah menerima manfaat serta berjaya dibantu untuk menjadi jaguh tempatan dan serantau sepanjang tiga tahun penuh pelaksanaan program BEA antara tahun 2014 hingga 2017 cukup memberangsangkan.

Sejumlah 13 buah GLC yang melaksanakan Program Pembangunan Vendor (PPV) telah memberi manfaat kepada 1,280 vendor (setakat Disember 2017) dan 36 jaguh tempatan dan 3 jaguh serantau. Antara jaguh tempatan dan serantau tersebut adalah Lite Kabel Sdn Bhd, Amat Sinar Sdn Bhd, Item Industrial Engineering Sdn Bhd, Indkom Engineering Sdn Bhd dan Hyrax Oil Sdn Bhd. Dalam tempoh yang sama, GLIC dan G20 juga telah menganugerahkan kontrak perolehan berjumlah RM51.1 bilion kepada kira-kira 15,000 usahawan Bumiputera. Pengagihan khusus yang telah dianugerahkan kepada usahawan Bumiputera adalah berjumlah RM18.8 bilion untuk tempoh tiga tahun tersebut.

Bagi syarikat Kerajaan yang dimiliki sepenuhnya melalui Menteri Kewangan Diperbadankan (MKD), beberapa inisiatif telah disasarkan sebagai sebahagian daripada KPI Agenda Bumiputera kepada syarikat MKD di bawah Kementerian Kewangan, antaranya:

- i. meningkatkan peratusan tenaga kerja Bumiputera di peringkat pengurusan tertinggi, peringkat pertengahan dan tenaga kerja yang berkemahiran (memperolehi sekurang-kurangnya ijazah pertama atau sijil kemahiran atau TVET) dalam syarikat MKD bagi memperkasa modal insan Bumiputera,
- ii. Memperkasa Komuniti Ekonomi Bumiputera dengan meningkatkan peratusan penjualan premis perniagaan dan kediaman untuk dimiliki oleh Bumiputera oleh UDA Holdings Berhad,
- iii. Pemberian dana modal teroka oleh syarikat Venture Capital (VC) Kerajaan kepada individu dan syarikat Bumiputera yang layak;
- iv. Program Pembangunan Usahawan Bumiputera oleh Malaysian Global Innovation & Creativity Centre (MAGIC); dan
- v. Inisiatif Pembangunan Vendor Bumiputera dan peningkatan syarikat Bumiputera dalam memperolehi kontrak atau perolehan utama syarikat MKD.

Selaras dengan komitmen Kerajaan untuk terus memperkasakan ekonomi Bumiputera, Lembaga Pengarah syarikat GLC dan GLIC akan terus memastikan semua inisiatif Bumiputera yang melibatkan peranan GLC dan GLIC secara langsung atau tidak langsung dilaksanakan dengan jayanya. Lembaga Pengarah syarikat GLC dan GLIC juga harus peka dengan setiap inisiatif terkini yang diumumkan Kerajaan dari semasa ke semasa mengenai agenda pemerkasaan ekonomi Bumiputera.

Walaupun inisiatif-inisiatif khas telah disediakan bagi memberi lebih peluang kepada Bumiputera, Agenda Pemerkasaan Ekonomi Bumiputera ini adalah bersandarkan prinsip mesra pasaran, berasaskan keperluan, berasaskan merit, ketelusan, daya saing, pro pertumbuhan serta mapan. Sehubungan itu, individu

**NO SOALAN : 6**

dan Syarikat Bumiputera yang berkelebihan harus bersaing sesama sendiri dan pemilihan akan dibuat berdasarkan merit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK DR. JEFFREY GAPARI  
KITINGAN [ KENINGAU ]**

**TARIKH : 25 OKTOBER 2018**

**SOALAN :**

Minta **MENTERI PELANCONGAN, SENI DAN BUDAYA** menyatakan apakah rancangan dan inisiatif Kementerian yang akan diambil untuk membantu dan mengembangkan ekopelancongan di luar bandar dan pedalaman Sabah dan Sarawak khasnya mini ekopelancongan dan inisiatif *homestay* memandangkan industri pelancongan di Sabah dan Sarawak adalah antara yang terbesar menjana peluang pekerjaan kepada ramai rakyat di Sabah dan Sarawak.

**JAWAPAN :**

Tuan Yang di-Pertua,

Kementerian Pelancongan, Seni dan Budaya telah merangka Pelan Ekopelancongan Kebangsaan 2016-2025 sebagai hala tuju dalam memperkukuhkan pembangunan dan memastikan kelestarian produk ekopelancongan di seluruh negara. Bagi negeri Sabah, Kementerian telah mengenalpasti lapan (8) kluster ekopelancongan dan bagi negeri Sarawak pula, sembilan (9) kluster ekopelancongan telah dikenalpasti mempunyai potensi untuk dibangunkan.

Lapan (8) Kluster Ekopelancongan di Sabah adalah seperti berikut:

1. Kota Kinabalu-Papar-Beaufort-Klias-Kuala Penyu-Menumbok-Sipitang-Long Pasia;
2. Sandakan-Kinabatangan;
3. Kota Kinabalu-Kota Belud-Kota Marudu-Kudat;
4. Kota Kinabalu-Tambunan-Crocker Range Park-Keningau-Tenom;
5. Kota Kinabalu-Tamparuli-Kundasang-Ranau;
6. Maliau Basin-Imbak Canyon;
7. Danum Valley-Tabin (Lahad Datu); dan
8. Tawau-Semporna-Mabul-Sipadan-Kunak.

Sembilan (9) Kluster Ekopelancongan di Sarawak adalah seperti berikut:

1. Lundu-Sematan-Telok Melano-Tanjung Datu;
2. Bako-Santubong-Kubah-Semenggoh-Bau-Padawan;
3. Sri Aman-Batang Ai-Ulu Sungai Menyang-Maludam;
4. Sibu-Kapit-Tunoh-Baleh-Palagus;
5. Mukah-Daro-Pulau Buit-Tanjung Manis;
6. Bintulu-Bakun-Belaga-Lusong Laku-Nanga Merit-Murum;

7. Miri-Sibuti-Niah-Loagan Bunut;
8. Limbang-Mulu-Gunung Buda; dan
9. Lawas-Bario-Ba'kalalan-Baram.

Menerusi pembangunan kluster-kluster ini, aktiviti ekopelancongan berasaskan komuniti *Community-Based Tourism* (CBT) diberi fokus untuk dikembangkan secara holistik dan dipromosikan secara bersepadu dengan destinasi pelancongan lain yang berada dalam kluster yang sama.

Antara inisiatif yang telah dilaksanakan oleh Kementerian dalam membantu mengembangkan inisiatif homestay adalah seperti berikut:

1. Memberi bantuan menaik taraf kemudahan guna sama (infrastruktur asas) di perkampungan *homestay* yang berdaftar untuk keselesaan dan kepuasan para pelancong yang menginap di *homestay*. Di bawah Rancangan Malaysia Kesebelas (RMKe-11), peruntukan sebanyak RM383,450 telah diberikan kepada homestay di negeri Sabah bagi tahun 2016 dan 2018 seperti berikut:
  - a) **Homestay Desa Cinta Kobuni, Inanam** bagi kerja menaiktaraf kemudahan homestay;
  - b) **Homestay Long Pasia, Sipitang** bagi kerja menaiktaraf jambatan Gantung;
  - c) **Homestay Kampung Bilit, Kinabatangan** bagi kerja membina jeti terapung dan laluan pejalan kaki; dan
  - d) **Homestay Moido Walai Toko, Kuala Abai, Kinabatangan** bagi kerja menaiktaraf jeti, pelantar terapung, laluan pejalan kaki dan kaunter informasi homestay.

Manakala sebanyak RM258,350.00 telah diperuntukkan bagi *homestay* di negeri Sarawak bagi tahun 2016 dan 2017 seperti berikut:

- a) **Homestay Santubong, Kuching** bagi kerja memasang pagar di sekeliling dewan homestay; dan

## NO. SOALAN: 7

- b) **Homestay Bakelalan, Lawas** bagi kerja-kerja membina papan tanda pelancongan homestay, menaiktaraf bengkel pemprosesan garam bukit, tandas awam dan laluan pejalan kaki.
2. Menganjurkan kursus dan latihan bagi memastikan kualiti perkhidmatan homestay yang optimum diberikan dan menawarkan pakej-pakej homestay yang menarik. Bagi tempoh Januari hingga September seramai 280 peserta homestay negeri Sabah dan 340 orang peserta homestay negeri Sarawak telah mengikuti kursus dan latihan seperti Kursus Asas Homestay, *Tourism Awareness* dan Sesi *Engagement* Homestay.
3. menyediakan platform promosi yang melibatkan pengusaha *homestay* yang dilaksanakan di peringkat Kementerian dan MOTAC Negeri sepanjang tahun 2018 seperti berikut:
- a) **Homestay Negeri Sabah:**
- i. Pameran Homestay Negeri Sabah sempena Fiesta Sayangi Lahad Datu@Silam pada 28 hingga 29 September 2018; dan
  - ii. Program *Visit My Kampung* di Desa Kg. Cinta Kobuni, Inanam pada 21 Mac 2018.
- b) **Homestay Negeri Sarawak:**
- i. Pameran homestay sempena Program MOTAC *Voluntourism* di Lawas pada 21 April 2018; dan
  - ii. Promosi *Visit My Kampung* Sematan sempena Program *Road to Malaysian Agriculture, Horticulture and Agrotourism Show (MAHA)* dengan kerjasama Kementerian Industri Asas Tani pada 24 hingga 25 Mac 2018.



## NO. SOALAN: 7

4. Menggalakkan para pengusaha homestay menjadi usahawan desa dan terlibat di dalam Industri Kecil dan Sederhana (IKS) seperti perusahaan kraftangan, makanan dan produk-produk nilai tambah lain untuk meningkatkan lagi pendapatan kepada masyarakat luar bandar.

Selain itu, Kementerian menerusi Perbadanan Kemajuan Kraftangan Malaysia juga komited membangunkan industri kraf tempatan di Sabah dan Sarawak melalui Pemerkasaan Komuniti Kraf sebagai salah satu usaha mewujudkan peluang pekerjaan dan menjana pendapatan komuniti setempat. Antara inisiatif yang dilaksanakan adalah:

1. Dua (2) projek berasaskan komuniti di Keningau, Sabah bagi produk anyaman buluh dan di Lawas serta Limbang, Sarawak bagi kraf parang pada tahun 2017. Sehingga Ogos 2018, projek-projek ini telah melibatkan seramai 182 orang usahawan dengan jumlah jualan sebanyak RM2.8 juta; dan
2. Program Pemerkasaan Komuniti Kraf di Lahad Datu, Sabah pada 29 September 2018 bagi membangun dan melatih komuniti yang menjalankan perusahaan kraf terutamanya batik, anyaman rotan, sulaman manik, ukiran mata dan sarung parang serta *soft toys* kekabu yang melibatkan seramai 77 orang peserta.

Kementerian Pelancongan, Seni dan Budaya sentiasa komited bagi memastikan program-program homestay dan pemerkasaan komuniti di negeri Sabah dan Sarawak diteruskan bagi menambahbaik ekonomi komuniti setempat.

Sekian, terima kasih.

**SOALAN NO. 8**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
[PONTIAN]**

**TARIKH : 25 OKTOBER 2018**

**SOALAN : 8**

**Datuk Seri Haji Ahmad bin Haji Maslan [Pontian]** minta **PERDANA MENTERI** menyatakan berapakah jumlah rakyat Malaysia yang berumur lebih 21 tahun tapi belum mendaftar sebagai pengundi. Pendaftaran automatik bila akan dibuat dan ianya perlu disegerakan, apa rasional menurunkan umur pengundi kepada umur 18 tahun ke atas.

**JAWAPAN:     YB DATUK LIEW VUI KEONG**  
**MENTERI DI JABATAN PERDANA MENTERI**

Tuan Yang Dipertua,

Untuk makluman Ahli Yang Berhormat, jumlah warganegara yang berumur 21 tahun dan ke atas yang layak tetapi belum mendaftar sebagai pemilih sehingga 30 Jun 2018 adalah seramai **3,663,634 orang**.

Berhubung dengan cadangan pelaksanaan urusan pendaftaran pemilih secara automatik, Suruhanjaya Pilihan Raya (SPR) **sedang meneliti berkaitan perkara tersebut** di mana ia akan melibatkan cadangan pindaan kepada undang-undang sedia ada, perubahan proses dan prosedur kerja urusan pendaftaran pemilih serta keperluan sistem dan peralatan serta implikasi kewangan untuk pelaksanaan sistem pendaftaran pemilih secara automatik.

Antara rasional Kerajaan untuk menurunkan had umur pengundi kepada 18 tahun adalah seperti berikut:

- (i) **Memastikan had umur mengundi setara piawaian antarabangsa.** Sebagai contoh, majoriti negara di Eropah, Amerika Selatan, Negara-negara Arab dan majoriti Negara-negara anggota ASEAN telah menetapkan had mengundi pada umur 16 dan 18 tahun sejak tahun 1970an;

- (ii) **Meningkatkan penyertaan belia** sebagai warga bertanggungjawab dalam menyumbang kepada pembangunan negara dengan menggalakkan penglibatan belia dalam proses demokrasi negara;
- (iii) **Mendidik dan melatih belia** agar mempercepat kematangan. Ia juga akan **memberikan tanggungjawab kepada belia mengenai urus tadbir negara** dengan mendidik belia untuk memikirkan masa depan negara;
- (iv) **Memantapkan proses pembangunan belia.** Proses membangunkan belia memerlukan satu perancangan strategik yang bersifat jangka masa panjang atau jangka masa pendek; dan
- (v) **Peranan belia sebagai rakan strategik negara.** Selain itu, ia juga akan mengiktiraf belia sebagai sumber dan aset negara terutamanya dalam membentuk acuan negara pada masa hadapan.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NOR AZRINA BINTI SURIP  
[MERBOK ]**

**TARIKH : 25 OKTOBER 2018 (KHAMIS)**

**SOALAN NO. 9**

Minta **MENTERI BELIA DAN SUKAN** menyatakan apakah usaha Kementerian Belia dan Sukan bagi memperkasakan sukan-sukan yang sebelum ini kita semua sedia maklum akan kepincangan dan campur tangan ahli politik terutamanya bola sepak dan mengembalikan hak pengurusan kepada ahlinya.

**JAWAPAN**

Tuan Yang di-Pertua,

1. Badan-badan sukan sebenarnya berstatus badan bukan kerajaan yang bertanggungjawab sepenuhnya ke atas pengurusan serta hal ehwal dalaman masing-masing tanpa sebarang campur tangan kerajaan apatah lagi, pengaruh parti-parti politik.
2. Justeru, pelantikan ahli-ahli jawatankuasa dibuat melalui pemilihan oleh ahli-ahli sesuatu badan tersebut dalam mesyuarat agung tahunan. Sudah tentu kerajaan tidak ada kuasa dan tidak boleh

sama sekali campurtangan dalam menentukan kepimpinan badan-badan sukan.

3. Kita semua sedia maklum bahawa apabila ada campur tangan kerajaan dalam beberapa persatuan sukan, persatuan sukan kebangsaan itu boleh dikenakan pergantungan oleh Persekutuan Sukan Antarabangsa. Sebagai contoh, Persatuan Sukan Kebangsaan yang menyelia sukan bola sepak ataupun sepak bola di negara Indonesia iaitu Persatuan Sepak Bola Seluruh Indonesia (PSSI) telah digantung disebabkan wujudnya campur tangan daripada kerajaan ataupun yang dianggap sebagai campur tangan daripada kerajaan. Begitu juga Negara Sierra Leone yang juga telah digantung FIFA baru-baru ini (Oktober 2018).
4. Acapkalinya, sesetengah badan-badan sukan melantik orang-orang politik untuk memegang jawatan dalam organisasi mereka atas sebab-sebab tertentu, terutamanya, anggapan bahawa dengan adanya orang politik maka lebih mudah bagi organisasi mereka untuk mendapatkan dana ataupun berurusan dengan kerajaan.
5. Keadaan ini wujud apabila tiada pematuhan kepada garis panduan Petunjuk-petunjuk Prestasi Utama, ataupun Key Performance Indicators (KPI) yang objektif dari segi pemberian dana dan lain-lain lagi. Kementerian melalui Majlis Sukan Negara (MSN) sedang menelitikan semula ekosistem sukan negara, termasuk hubungan antara persatuan-persatuan sukan dengan kerajaan. Ini termasuk mengkaji semula garispanduan peruntukan dana kerajaan bagi memastikan prinsip keadilan dan ketelusan dilaksanakan selain memupuk semula profesionalisme badan-badan sukan sebagai badan-badan berkecuali yang memberi fokus kepada perkembangan sukan tanahair.
6. Kita ingin mengikis perspektif, “ada orang dalam akan memudahkan pekerjaan”.

Sekian, terima kasih.

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : DATUK WILSON UGAK ANAK KUMBONG [ HULU RAJANG ] – PRS**

**TARIKH : 25 OKTOBER 2018 (KHAMIS)**

**SOALAN : 10**

**PR-1412-L02022**

**DATUK WILSON UGAK ANAK KUMBONG [ HULU RAJANG ]** minta **MENTERI KOMUNIKASI DAN MULTIMEDIA** menyatakan :-

- a) adakah pihak Kementerian mempunyai alternatif terbaru dalam usaha untuk meningkatkan kelajuan internet di luar bandar setaraf dengan di bandar; dan
- b) pendekatan Kementerian untuk menyediakan akses internet yang berkualiti kepada rakyat.



**JAWAPAN**

**Tuan Yang di-Pertua,**

1. Untuk makluman Ahli Yang Berhormat,
  - a) dalam memastikan perkhidmatan Internet berkelajuan tinggi dapat disediakan kepada rakyat, ia memerlukan jaringan infrastruktur komunikasi yang meluas dan komprehensif di seluruh pelosok negara termasuklah di luar bandar seperti jaringan gentian optik dan menara komunikasi tertakluk kepada peruntukan, kos operasi dan juga mengambil kira keadaan geografi di sesuatu kawasan.

Dalam hal ini, beberapa inisiatif berasaskan pemasangan gentian optik sedang dilaksanakan oleh Kerajaan seperti projek Jalur Lebar Berkelajuan Tinggi (*High Speed Broadband* - HSBB) dan projek Jalur Lebar Pinggir Bandar (*Sub Urban Broadband* - SUBB) di mana ia memberi fokus kepada pemasangan gentian optik dengan kaedah penaiktarafan ibu sawat di seluruh negara.

Bagi memastikan kemudahan jalur lebar dan internet dapat dinikmati oleh pengguna di kawasan luar bandar, Kementerian melalui Suruhanjaya Komunikasi dan Multimedia Malaysia (SKMM) telah dan sedang melaksanakan pelbagai inisiatif bagi menambahbaik infrastruktur komunikasi melalui program Pemberian Perkhidmatan Sejagat (USP).

Melalui dana USP, menara-menara baharu dibina di samping kerja-kerja penaiktarafan menara komunikasi sedia ada kepada perkhidmatan jalur lebar mudah alih 3G/4G dengan teknologi gentian optik di seluruh negara terutamanya di kawasan luar bandar dan pendalaman yang sedang dijalankan secara berperingkat.

Di bawah projek Jalur Lebar Pinggir Bandar (SUBB) dan Jalur Lebar Luar Bandar (RBB) pula yang menyediakan kemudahan jalur lebar dengan kelajuan sehingga 20Mbps di kawasan pinggir dan luar bandar, sebanyak 528 ibusawat sedang dinaiktaraf di seluruh negara yang dijangka akan siap secara berperingkat pada tahun 2019.

Pihak Kerajaan juga sentiasa memantau kualiti perkhidmatan dengan mengukur tahap pematuhan terhadap *standard mandatori* yang dikawal selia melalui SKMM. Ketidakpatuhan terhadap *standard mandatori* berkenaan adalah satu kesalahan di bawah Akta Komunikasi dan Multimedia 1998.

- b) Pendekatan Kementerian secara berterusan dalam melaksanakan pelbagai inisiatif menaiktaraf kelajuan perkhidmatan jalur lebar bagi memastikan perkhidmatan jalur lebar dapat ditawarkan secara menyeluruh dan berkualiti di seluruh negara dari masa ke semasa sama ada melalui peluasan jalur lebar talian tetap dan mudah alih di seluruh negara. Antara alternatif Kerajaan adalah dengan mewujudkan lebih banyak liputan fiber di seluruh negara. Inisiatif ini bertujuan untuk menggalakkan lebih banyak infrastruktur komunikasi dibangunkan, Kerajaan akan meneruskan pemberian lesen kepada syarikat-syarikat yang memenuhi syarat bagi membolehkan lebih banyak liputan fiber (*Fiber Coverage*) diwujudkan. Tumpuan adalah bagi memastikan kelajuan internet dan jalur lebar dipertingkatkan dengan kualiti perkhidmatan yang memuaskan dengan harga yang rendah.

Fokus dan pendekatan Kerajaan adalah untuk menyediakan infrastruktur yang mencukupi bagi memenuhi keperluan masyarakat pengguna secara saksama diseluruh pelusuk negara. Memandangkan kos untuk menyediakan perkhidmatan ini adalah sangat tinggi, maka fokus akan diberikan kepada liputan (coverage) terlebih dahulu dan kemudian barulah kelajuan (speed) akan dipertingkatkan. Melalui pendekatan ini,

## SOALAN NO: 10

rakyat di seluruh negara akan dapat merasai pengalaman Internet sama ada di kawasan bandar atau luar bandar.

Di samping itu, di bawah inisiatif Peluasan Liputan Selular dan Jalur Lebar Mudah Alih yang melibatkan pembinaan menara komunikasi baharu dan penaiktarafan menara komunikasi sedia ada, sebanyak 1,766 menara komunikasi baharu telah siap dibina dan beroperasi dengan perkhidmatan jalur lebar mudah alih 3G manakala 269 menara sedang dalam peringkat pelaksanaan di seluruh negara terutamanya di kawasan di luar bandar.

Selain itu, sebanyak 4,795 menara sedia ada telah dinaiktaraf kepada perkhidmatan jalur lebar mudah alih 3G/4G manakala 768 menara sedia ada masih dalam peringkat penaiktarafan di seluruh negara.

Kerajaan akan melaksanakan inisiatif-inisiatif baru seperti ini untuk meluaskan liputan dan menambahbaik mutu perkhidmatan jalur lebar.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : TUAN WONG TIEN FATT @ WONG**  
**NYUK FOH [SANDAKAN]**  
**TARIKH : 25 OKTOBER 2018 (KHAMIS)**

**SOALAN NO.11**

Minta **MENTERI TENAGA, SAINS, TEKNOLOGI ALAM SEKITAR DAN PERUBAHAN IKLIM** menyatakan perancangan Kerajaan Persekutuan dalam meningkatkan kapasiti penjana kuasa di Sabah. Adakah penjana kuasa melalui arang batu sebagai satu opsyen dalam cadangan Kerajaan memandangkan rakyat Sabah telah membantah cadangan tersebut yang dibangkitkan oleh Kerajaan dahulu.

**JAWAPAN**

Tuan Yang di-Pertua,

Untuk makluman Ahli Yang Berhormat,

1. Perancangan Kerajaan Persekutuan dalam meningkatkan kapasiti penjanaan di Sabah diputuskan di dalam Mesyuarat Jawatankuasa Perancangan dan Pelaksanaan Pembekalan Elektrik dan Tarif (JPPPET) yang dipengerusikan oleh YB Menteri Tenaga, Sains, Teknologi, Alam Sekitar dan Perubahan Iklim. Melalui mesyuarat tersebut, Pelan Pembangunan Penjanaan Elektrik bagi negeri Sabah untuk tempoh 20 tahun ditetapkan dengan mengambil kira perkara-perkara berikut:
  - (i) unjuran serta permintaan tenaga elektrik;
  - (ii) dasar-dasar Kerajaan mengenai pembekalan elektrik negara;
  - (iii) campuran bahan api yang akan digunakan; dan
  - (iv) kos penjanaan elektrik yang optimum.
2. Berdasarkan kajian yang dibuat oleh Suruhanjaya Tenaga yang dibentangkan dalam mesyuarat JPPPET pada 11 Oktober 2018, Kerajaan berpendapat pengukuhan talian penghantaran sedia ada dari Pantai Barat ke Pantai Timur Sabah dapat menyediakan alternatif kepada pembangunan loji jana kuasa baharu di Pantai Timur Sabah sehingga tahun 2024. Oleh itu, Kerajaan sedang mengambil tindakan untuk melaksanakan pengukuhan sambung tara Pantai Barat-Pantai Timur Sabah yang dijangka akan disiapkan menjelang tahun 2021.
3. Pada masa ini, Kerajaan Persekutuan tidak mempunyai perancangan untuk menggunakan arang batu untuk penjanaan elektrik di Sabah. Walau bagaimanapun, sebarang cadangan bagi tujuan menjana tenaga elektrik, tanpa mengira punca penjanaan, akan bergantung kepada persetujuan Kerajaan Negeri Sabah.

Sekian, terima kasih.

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' ROSOL BIN WAHID  
[ HULU TERENGGANU ]**

**TARIKH : 25 OKTOBER 2018 (KHAMIS)**

**SOALAN: 12**

Minta **MENTERI PENDIDIKAN** menyatakan adakah Kementerian berhasrat menarik semula pembatalan langganan akhbar Utusan Malaysia dan Mingguan Malaysia yang dibuat pada 18 Julai 2018 di semua bahagian, agensi, sekolah, universiti, kolej dan semua institusi di bawah Kementerian, memandangkan akhbar tersebut kini berwajah baru dengan bersaiz kompak dan lebih mesra pembaca.

**JAWAPAN**

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) berpendirian bahawa buat masa kini keputusan pembatalan langganan akhbar Utusan Malaysia dan Mingguan Malaysia dikekalkan. Berita dari surat khabar ini boleh di akses secara atas talian manakala berita juga boleh diperolehi daripada pelbagai media sosial. Secara umum, hasrat KPM adalah untuk melanggan akhbar-akhbar yang mewar-warkan nilai-nilai murni, memupuk perpaduan dan bukan sebaliknya. Hal ini adalah bagi memastikan warga pendidikan dapat membuat pertimbangan rasional berdasarkan isu-isu semasa di samping dapat mewujudkan sikap menerima, menghormati dan mengurus kepelbagaian agama, bangsa, budaya dan bahasa di Malaysia.

RJM40

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN ALI ANAK BIJU (SARATOK)**

**TARIKH : 25 OKTOBER 2018**

**SOALAN : 13**

**Tuan Ali anak Biju [ Saratok ] minta MENTERI DALAM NEGERI** menyatakan apakah status dan perancangan pihak Kementerian berkenaan dengan keperluan pembinaan baru Ibu Pejabat Polis (IPD) Saratok bagi menggantikan Ibu Pejabat Polis sekarang yang telah beroperasi sejak tahun 1954.



**JAWAPAN:**

Tuan Yang Di Pertua,

Kompleks sedia ada mula digunakan sejak tahun 1954 sebagai Balai Polis Saratok sebelum dinaiktaraf menjadi Ibu Pejabat Polis Daerah (IPD) Saratok pada tahun 1992. IPD Saratok beroperasi di tapak Lot 403 seluas 7.493 hektar dengan perjawatan seramai 134 orang anggota yang diketuai oleh seorang Ketua Polis Daerah berpangkat DSP.

Perumahan kompleks ini terdiri dari rumah jenis banglo dan tiga (3) buah blok apartmen/flat dengan jumlah keseluruhan sebanyak 29 unit.

Pada masa ini, pihak Kementerian sedang memberi penumpuan dan keutamaan bagi pembinaan projek sedia ada (baharu dan sambungan) serta kerja-kerja menaiktaraf premis PDRM yang uzur. Walau bagaimanapun, cadangan projek ini akan dimasukkan dalam *Rolling Plan* (RP) berikutnya sekiranya terdapat keperluan mendesak untuk dilaksanakan.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : YB DATO' SRI DR. HAJI WAN JUNAIDI  
BIN TUANKU JAAFAR [SANTUBONG]**

**TARIKH : 25 OKTOBER 2018**  
**MENJAWAB**

**SOALAN : 14**

**YB DATO' SRI DR. HAJI WAN JUNAIDI BIN TUANKU JAAFAR [SANTUBONG]** minta **PERDANA MENTERI** menyatakan sama ada Kerajaan akan menubuhkan Jawatankuasa atau Badan atau mengarahkan Peguam Negara untuk mengenal pasti undang-undang digubal di Parlimen semenjak Ogos 1963 yang mencabuli Perlembagaan Persekutuan, atau Perjanjian Malaysia 1963, dan kalau ia, siapa ahli-ahlinya, dan bila kajian akan dimulakan dan bila dijangka selesai.

**JAWAPAN:      YB DATUK LIEW VUI KEONG**

**MENTERI DI JABATAN PERDANA MENTERI**

1. Jemaah Menteri pada 5 September 2018 telah bersetuju untuk menubuhkan suatu Jawatankuasa Khas Kabinet untuk menyemak dan meneliti hak Kerajaan Negeri Sabah dan Kerajaan Negeri Sarawak di bawah Perjanjian Malaysia 1963. Terma rujukan bagi Jawatankuasa Khas Kabinet tersebut antaranya adalah untuk mengenal pasti dan menyemak isu berhubung dengan pelaksanaan hak-hak dan kuasa autonomi Kerajaan Negeri Sabah dan Kerajaan Negeri Sarawak berdasarkan Perlembagaan Persekutuan, Perjanjian Malaysia 1963 dan *Report of the Inter-Governmental Committee 1962* serta memperakukan syor berhubung dengan keperluan untuk memperbaharu kerangka perundangan.

2. Jawatankuasa Khas Kabinet ini bertanggungjawab untuk meneliti dan mempertimbangkan apa-apa cadangan berhubung dengan hak Kerajaan Negeri Sabah dan Kerajaan Negeri Sarawak antaranya cadangan untuk mengembalikan status Kerajaan Negeri Sabah dan Kerajaan Negeri Sarawak sebagai rakan kongsi yang mempunyai sama taraf dalam pembentukan Persekutuan Malaysia, cadangan penggubalan suatu Perlembagaan baharu dan perkara-perkara lain yang berkaitan dengannya.

3. Seterusnya, berkenaan dengan status pelaksanaan perkara di bawah *Devolution of Power* untuk Kerajaan Negeri Sabah dan Kerajaan Negeri Sarawak seperti yang telah dipersetujui sebelum ini,

khasnya untuk mengembalikan kuasa perlombongan dan pengedaran minyak dan gas kepada Sabah dan Sarawak, dan mengembalikan pemilikan dan pengurusan Sabah Electricity Sdn. Bhd. (SESB) kepada Kerajaan Negeri Sabah dan apa-apa perkara di bawah pelaksanaan *Devolution of Authority* kepada Kerajaan Negeri Sabah dan Kerajaan Negeri Sarawak boleh diteliti dan dipertimbangkan semula oleh Jawatankuasa Khas Kabinet ini memandangkan perkara ini merupakan keputusan dasar yang hendaklah diputuskan oleh Kerajaan yang memerintah pada masa kini.

Sekian, terima kasih.

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN ANYI NGAU [ BARAM ]**

**TARIKH : 25 OKTOBER 2018 (KHAMIS)**

**SOALAN NO: 15**

Minta **MENTERI PENDIDIKAN** menyatakan bilangan sekolah yang dikategorikan daif dan usang mengikut wilayah Sarawak, Sabah dan Semenanjung Malaysia berbandingkan dengan jumlah sekolah di seluruh negara dan nyatakan rancangan Kementerian berkaitan status pembaikan semula sekolah daif dan usang serta kurang murid di pendalaman Sarawak.

**JAWAPAN**

Tuan Yang di-Pertua,

Jumlah keseluruhan sekolah daif di seluruh negara adalah sebanyak 1,498 buah sekolah. Daripada jumlah tersebut, sebanyak 1,030 sekolah daif di negeri-negeri semenanjung Malaysia, 206 sekolah di Sarawak, 258 sekolah di Sabah dan empat (4) sekolah di Wilayah Persekutuan Labuan.

Kementerian Pendidikan Malaysia (KPM) dari semasa ke semasa mengenal pasti sekolah atau bangunan sekolah yang perlu dibaiki dan diselenggarakan bagi memastikan sekolah mempunyai kemudahan pendidikan yang sempurna. Antara langkah yang diambil oleh KPM bagi menangani isu sekolah daif adalah dengan melakukan penyelenggaraan segera bagi sekolah yang mempunyai keperluan kritikal untuk pembaikan dan menaik taraf kemudahan infrastruktur serta menggantikan bangunan sekolah daif yang disahkan tidak selamat dengan bangunan baharu. Walau bagaimanapun, pelaksanaan kerja-kerja tersebut bergantung kepada kedudukan kewangan kerajaan.

Berhubung perancangan untuk Sekolah Kurang Murid (SKM), terdapat dua (2) strategi yang telah dicadangkan di bawah Pelan Hala Tuju SKM untuk mengatasi isu penurunan enrolmen murid di bawah 150 orang iaitu strategi jangka pendek pelaksanaan kelas bercantum bagi sekolah berenrolmen di bawah 30 orang dan strategi jangka panjang iaitu pemindahan ke lokasi baharu yang boleh membantu peningkatan enrolmen serta penggabungan sekolah. Sebelum KPM melaksanakan

strategi pemindahan dan penggabungan sekolah tersebut, beberapa perkara perlu diambilkira seperti pertimbangan tentang jarak, kemudahan pengangkutan, kesediaan kanak-kanak untuk bersekolah di sekolah baharu serta persetujuan komuniti setempat. Bagi sekolah bantuan kerajaan pihak Lembaga Pengelola Sekolah (LPS) bertanggungjawab untuk menyediakan tapak di lokasi baharu serta membiayai kos perpindahan dan pembinaan bangunan baharu di tapak baharu.

Berdasarkan Pelan Tindakan Penggabungan Sekolah bagi negeri Sarawak didapati bahawa terdapat keperluan untuk sekolah berstatus SKM kekal berada di kawasan sedia ada disebabkan oleh faktor fizikal serta penempatan komuniti yang memerlukan sebuah sekolah di kawasan tersebut.

Sekian, terima kasih.

RJM44

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI ABDUL AZEEZ BIN ABDUL RAHIM  
[BALING]**

**TARIKH : 25 OKTOBER 2018 (KHAMIS)**

**SOALAN NO. 16**

Minta **MENTERI HAL EHWAL EKONOMI** menyatakan apakah strategi Kerajaan dalam membantu meningkatkan taraf hidup golongan B40 dan apakah inisiatif Kerajaan untuk meringankan kos sara hidup mereka.



**JAWAPAN**

Yang di-Pertua,

Untuk makluman Ahli Yang Berhormat, pelbagai usaha pembangunan secara inklusif akan dilaksanakan oleh Kerajaan Baharu bagi membantu meningkatkan taraf hidup golongan B40. Beberapa inisiatif strategik sepertimana dizahirkan dalam Kajian Separuh Penggal, Rancangan Malaysia Ke-11 akan dilaksanakan bagi mengurangkan ketidaksamarataan sosioekonomi dan di antaranya adalah;

- i. meningkatkan pendapatan isi rumah miskin dan berpendapatan rendah menerusi bantuan diberikan kepada kumpulan isi rumah miskin dan berpendapatan rendah untuk meningkatkan pendapatan, kuasa beli dan kesejahteraan hidup;
- ii. meningkatkan keupayaan mendapat pekerjaan dengan meningkatkan keupayaan isi rumah B40 mendapatkan pekerjaan terutamanya bagi pekerjaan berpendapatan tinggi, keutamaan akan diberi untuk membina kapasiti dan keupayaan melalui pendidikan dan latihan kemahiran;
- iii. menggalakkan keusahawanan dengan penubuhan semula Kementerian Pembangunan Usahawan (MED) untuk menerajui program pembangunan keusahawanan secara menyeluruh dan bersepadu;
- iv. meningkatkan produktiviti menerusi penggunaan teknologi dan amalan terbaik terus digalakkan dalam kalangan isi rumah B40 untuk meningkatkan produktiviti dan menjana lebih pendapatan;
- v. meningkatkan sistem perlindungan sosial di mana satu rangka kerja bagi sistem perlindungan sosial bersepadu dan komprehensif akan

## SOALAN NO : 16

diwujudkan dalam meningkatkan perlindungan dan kesejahteraan, khususnya isi rumah B40; dan

- vi. menambah baik pengukuran kemiskinan menerusi model Pendapatan Garis Kemiskinan (PGK) semasa yang mana akan dikaji semula untuk lebih menggambarkan corak penggunaan dan keperluan serta demografi semasa isi rumah.

Kerajaan juga akan melaksanakan beberapa inisiatif bagi mengurangkan kos sara hidup atau meningkatkan kuasa beli rakyat terutama dalam kalangan isi rumah B40. Di antaranya adalah;

- i. menangani herotan pasaran dengan menggalakkan persaingan pasaran yang lebih dinamik dan cekap, menggalakkan inovasi, meningkatkan produktiviti dan memperkukuh pertumbuhan ekonomi serta mendorong kepada kecekapan pasaran bagi meningkatkan kepuasan dan kesejahteraan pengguna;
- ii. mewujudkan lebih banyak ruang penawaran barangan dan perkhidmatan pada harga yang berpatutan dan kompetitif untuk meningkatkan kecekapan pasaran;
- iii. penguatkuasaan ke atas peraturan kawalan harga di bawah Akta Kawalan Harga dan Antipencatutan 2011 diteruskan untuk mencegah amalan pencatutan; dan
- iv. meningkatkan tahap konsumerisme serta subsidi yang hanya diberi kepada kumpulan sasar bagi barangan asas terpilih berdasarkan prinsip keperluan di kalangan pengguna untuk memainkan peranan yang lebih besar dalam melaporkan amalan perniagaan tidak beretika melalui pelbagai saluran termasuk Skuad Pengguna, persatuan pengguna, *Friends of KPDNHEP* dan sistem EZ Adu. Kesedaran berkaitan konsumerisme yang lebih baik diterap dalam kalangan pelajar melalui Kelab Pengguna Sekolah dan Gerakan Pengguna Siswa. Selain itu, peranan persatuan pengguna

**SOALAN NO : 16**

diperkukuh untuk meningkatkan kesedaran dan menggalakkan perkongsian maklumat dalam kalangan pengguna bagi mempertingkatkan tahap konsumerisme.

Sekian, terima kasih.

25 Oktober 2018

Kementerian Hal Ehwal Ekonomi

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN JUGAH ANAK MUYANG @ TAMBAT  
[ LUBOK ANTU ]**

**TARIKH : 25 OKTOBER 2018 (KHAMIS)**

**SOALAN NO: 17**

Minta **MENTERI PENDIDIKAN** menyatakan apakah status penyambungan grid ke Delok dan Sekolah Kebangsaan Nanga Kesit dan apa tindakan diambil setakat ini.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa berusaha untuk menyediakan prasarana yang terbaik di semua sekolah di bawah KPM termasuklah memastikan semua sekolah dilengkapi kemudahan asas seperti bekalan elektrik dan air terawat. Berhubung bekalan elektrik, KPM dalam perancangan untuk melaksanakan kerja-kerja penyambungan bekalan elektrik ke talian grid awam bagi sekolah-sekolah di luar bandar di Sarawak secara berperingkat-peringkat mulai tahun 2018 hingga 2020. SK Nanga Kesit dan SK Nanga Delok telah dikenal pasti untuk cadangan kerja-kerja penyambungan bekalan elektrik ke talian grid awam. Manakala bagi sekolah-sekolah yang terletak jauh daripada talian grid awam, bekalan elektrik melalui penggoperasian set janakuasa (genset) akan diteruskan pelaksanaannya.

Sekian, terima kasih.

RJM41

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI SHABUDIN BIN  
YAHAYA  
[ TASEK GELUGOR]**

**TARIKH SOALAN : 25 OKTOBER 2018  
[KHAMIS]**

**SOALAN NO.18**

minta **MENTERI PEMBANGUNAN USAHAWAN** menyatakan adakah Kementerian mempunyai sistem pengurusan data usahawan atas talian dan apakah bentuk bantuan yang akan diberikan oleh Kerajaan untuk membantu memasarkan produk mereka keluar negara.

**JAWAPAN**

Tuan Yang Dipertua,

Kementerian Pembangunan Usahawan (MED) telah ditubuhkan semula pada 16 Julai 2018 bagi menerajui agenda pembangunan usahawan dan Perusahaan Kecil dan Sederhana (PKS) yang dahulunya diletakkan di bawah tanggungjawab beberapa Kementerian/agensi berkaitan. Sehubungan itu, bagi mewujudkan sistem pengurusan dan pembangunan usahawan yang lebih bersepadu dan holistik, penyelarasan program-program sedia ada termasuk program pembiayaan dan data-data berkaitan usahawan dan SME telah mula dilaksanakan oleh MED.

Bagi sistem pengurusan data usahawan atas talian, agensi di bawah MED iaitu SME Corp. telah membangunkan SCenIc (*SME Central Incentives System*), iaitu satu pangkalan data bersepadu yang terdiri daripada senarai benefisiari insentif dan bantuan kewangan yang disediakan oleh Kerajaan. Pangkalan data bersepadu ini akan membantu Kementerian dan agensi untuk membuat keputusan yang tepat bagi pengagihan sumber / insentif yang berkesan.

Melalui SCenIc, Kementerian dan Agensi boleh berkongsi data penerima insentif dan bantuan kewangan yang seterusnya mampu mengelakkan pertindihan bantuan bagi projek yang sama kepada sesebuah syarikat. Selain daripada itu, SCenIc juga memberi akses kepada maklumat mengenai penerima bantuan Kerajaan dan insentif kepada Kementerian dan agensi bagi membantu menilai keberkesanan bantuan yang disediakan.

Tuan Yang Dipertua,

Bagi membantu para usahawan meluaskan perniagaan sehingga ke peringkat global termasuk memasarkan produk yang dihasilkan ke luar negara, pelbagai jenis bantuan disediakan oleh Kerajaan untuk memastikan produk barangan buatan Malaysia khususnya yang dihasilkan oleh PKS dapat bersaing di pasaran serantau.

Sehubungan dengan ini, pelbagai inisiatif dilaksanakan oleh agensi di bawah MED seperti SME Corp, terutamanya dalam meningkatkan kapasiti dan keupayaan PKS dalam menembusi pasaran eksport. Melalui kerjasama SME Corp. Malaysia dan MATRADE, program *Going Export* atau GoEx merupakan salah satu Program Berimpak Tinggi di bawah Pelan Induk PKS (2012-2020) bertujuan untuk membantu pengeksport PKS baharu dan sedia ada, meningkatkan pasaran mereka atau menembusi pasaran baharu.

Sejak ianya ditubuhkan, pelaksanaan program GoEX telah memanfaatkan 287 PKS dengan kontrak berpotensi jualan bernilai lebih RM403 juta. Sejak program ini diperkenalkan pada tahun 2014, sebanyak 74 penerokaan pasaran (*market immersion*) telah dijalankan dengan 37 negara baru berjaya diterokai.

Selain itu, terdapat juga program Galakan Eksport Bumiputera (GEB) bertujuan untuk meningkatkan bilangan dan membangunkan keupayaan pra-eksport PKS Bumiputera yang berprestasi tinggi dan berpotensi untuk pasaran eksport serta mewujudkan rantai bekalan domestik dalam kalangan PKS Bumiputera.



## **NO. SOALAN: 18**

Program GEB ini menawarkan bantuan bersepadu merangkumi geran yang nilai maksimumnya adalah RM500,000.00 atau 50% daripada jumlah kos projek yang nilai maksimumnya adalah RM1 juta. Bantuan geran meliputi aktiviti seperti penubuhan pejabat operasi serta aktiviti promosi dan pemasaran di luar negara, pembangunan jenama, kajian pasaran dan sebagainya.

Sejak Program GEB dimulakan pada tahun 2016 sehingga September 2018, sejumlah 37 permohonan telah diluluskan dengan nilai geran bersamaan dan pinjaman berjumlah RM38.15 juta (25 kelulusan geran berjumlah RM3.62 juta dan 12 kelulusan pinjaman mudah berjumlah RM34.53 juta). Permohonan yang diluluskan merangkumi antaranya aktiviti promosi dan pemasaran di luar negara, peningkatan pembungkusan, pembangunan jenama dan pensijilan bagi mematuhi piawaian antarabangsa, pembelian mesin dan modal kerja. Antara destinasi negara yang telah dimanfaatkan oleh penerima geran dan pinjaman Program GEB adalah seperti United Kingdom, Arab Saudi, Jepun, Australia, Belanda dan Indonesia.

Kementerian sedang mengkaji semula keberkesanan kedua-dua program tersebut, serta merangka beberapa penambahbaikan untuk membantu para PKS memasarkan produk mereka ke luar negara.

Selain itu, baru-baru ini pada 8 Oktober 2018, MED melalui SME Bank telah melancarkan produk MySMExport untuk membantu usahawan dan PKS untuk menembusi pasaran global dan seterusnya menyumbang kepada perkembangan prestasi ekonomi negara. Produk ini membantu dalam memberi khidmat nasihat kepada usahawan dan PKS untuk menyelesaikan masalah pembiayaan serta mengembangkan perniagaan

**NO. SOALAN: 18**

mereka ke tahap yang lebih tinggi, membolehkan mereka untuk membeli aset tetap baharu, mendapatkan modal kerja atau akses kepada kemudahan perdagangan dengan bank komersial.

- (i) Jumlah pembiayaan sehingga RM5 juta.
- (ii) Permohonan secara dalam talian melalui [mysmebank.com.my](http://mysmebank.com.my)
- (iii) Tiada cagaran diperlukan untuk pembiayaan modal kerja namun tertakluk kepada terma & syarat.
- (iv) Akses kepada program sokongan perdagangan daripada MATRADE.
- (v) Akses kepada kemudahan perdagangan dengan bank komersial.

Sekian, terima kasih

.....

**SOALAN NO : 19**

**MESYUARAT KEDUA, PENGGAL PERTAMA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : LISAN**

**DARIPADA : YB DR. KELVIN YII LEE WUEN**

**KAWASAN : BANDAR KUCHING**

**TARIKH : 25 OKTOBER 2018, KHAMIS**

**SOALAN :**

**YB DR. KELVIN YII LEE WUEN** minta **MENTERI KERJA RAYA** menyatakan hasrat kerajaan untuk mengkaji semula projek-projek mega di Sarawak termasuk Pan Borneo Highway dan jika ada penyelewengan dalam pelaksanaan projek tersebut. Berapakah peruntukan yang sudah disalurkan sehingga kini ke kontraktor-kontraktor yang terlibat termasuk "*main-con*" Lebuhraya Borneo Utara Sdn. Bhd. (LBU) dan senarai "*sub-con*" bagi setiap pakej di Sarawak.

**JAWAPAN :**

Tuan Yang Di-Pertua,

Untuk makluman Ahli Yang Berhormat, bagi Negeri Sarawak terdapat 21 projek pembangunan di bawah seliaan Kementerian Kerja Raya (KKR) dengan kos projek keseluruhan sebanyak RM4.022 bilion termasuk sebahagian daripada jajaran Lebuhraya Pan Borneo yang dijalankan secara konvensional. Daripada 21 projek pembangunan tersebut, 11 projek telah disiapkan, 3 projek masih dalam pembinaan, 4 projek masih belum mula dan 3 projek ditangguhkan pelaksanaannya.

Tuan Yang Di-Pertua,

Di samping 21 projek pembangunan di atas, KKR turut melaksanakan projek Lebuhraya Pan Borneo di Negeri Sarawak yang dilaksanakan menerusi Rakan Pelaksana Projek (*Projek Delivery Partner – PDP*). Fasa 1 projek Lebuhraya Pan Borneo Sarawak melibatkan jajaran dari Telok Melano hingga ke Miri yang terdiri daripada 11 pakej dengan anggaran panjang 786km kini sedang giat dilaksanakan. PDP bagi projek Fasa 1 Lebuhraya Pan Borneo Sarawak antara lainnya bertanggungjawab untuk melantik kontraktor atau Kontraktor Pakej Kerja (*Work Package Contractor – WPC*).

Pemilihan WPC adalah berdasarkan penilaian oleh Jawatankuasa Tender yang dianggotai oleh wakil-wakil Kerajaan Persekutuan dan Kerajaan Negeri. Senarai WPC yang dilantik adalah seperti berikut:

1. WPC 01, Telok Melano ke Sematan (TMS) - Samling Resources Sdn Bhd.;
2. WPC 02, Sematan ke Sungai Moyan (SSM) - Samling Resources Sdn. Bhd.;
3. WPC 03, Bulatan Serian ke Persimpangan Pantu (SPJ) Zecon-Kimlun Consortium JV;

4. WPC 04, Persimpangan Pantu ke Batang Skrang (PJS) - Naim Engineering Sdn. Bhd.-Gamuda Berhad JV;
5. WPC 05, Batang Skrang ke Sungai Awik (SSA) - Endaya Construction S/B – Trans Resources-Pembinaan Kuantiti JV;
6. WPC 06, Jambatan Sungai Awik ke Persimpangan Bintangor (SAB) - PPES Works (Sarawak) Sdn. Bhd.-Bina Puri Holding Bhd. JV;
7. WPC 07, Persimpangan Bintangor ke Persimpangan Julau (BSK) - Hock Seng Lee – Dhaya Maju Infrastructure Asia JV;
8. WPC 08, Jambatan Sungai Kua ke Jambatan Sungai Arip (SKB) - Musyati Sdn. Bhd.-Mudajaya Group Bhd. JV;
9. WPC 09, Jambatan Sungai Arip ke Persimpangan Bintulu Airport (ABJ) - KKB Engineering-WCT Berhad JV;
10. WPC 10, Persimpangan Bakun ke Sungai Tangap (BJT) - Pekerjaan Piasau Konkerit Sdn. Bhd.; dan
11. WPC 11, Sungai Tangap ke Jalan Pujut Link (TPL) - KACC Construction Sdn. Bhd.-IJM-Perbena Emas JV.

Sehingga September 2018, sebanyak RM3.774 bilion telah dibayar bagi pelaksanaan projek Lebuhraya Pan Borneo Sarawak. Ini termasuklah bayaran yang melibatkan WPC, imbuhan balik PDP, yuran PDP dan pengambilan balik tanah.

Tuan Yang Di-Pertua,

Untuk makluman Ahli Yang Berhormat, mekanisme dan pelaksanaan projek Lebuhraya Pan Borneo Sarawak sedang dalam peringkat akhir untuk dimuktamadkan oleh Kerajaan Pusat.

Sekian, terima kasih.

**DEWAN RAKYAT**  
**PEMBERITAHUAN PERTANYAAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS (2018)**

**PERTANYAAN : LISAN**

**DARIPADA : YB TUAN AHMAD TARMIZI BIN SULAIMAN  
[ SIK ]**

**TARIKH : 25 OKTOBER 2018 ( KHAMIS )**

**SOALAN:**

**Tuan Ahmad Tarmizi bin Sulaiman [ Sik ]** minta **PERDANA MENTERI** menyatakan jumlah pusat pengajian Islam pondok tradisional di seluruh Malaysia dan langkah Kerajaan untuk menambah baik infrastruktur dan kurikulum pengajiannya.

**JAWAPAN :** **(YB DATUK SERI DR MUJAHID YUSOF,  
MENTERI DI JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, berdasarkan Sistem Maklumat Pendidikan Islam (SIMPENI) sehingga Jun 2018 terdapat sebanyak 149 buah sekolah pondok yang berdaftar.

Kerajaan sentiasa membela dan menyokong sekolah pondok dengan menyediakan peruntukan kepada institusi tersebut yang turut sama menyumbang kepada pembangunan modal insan negara. Umpamanya pada tahun 2015 Kerajaan telah memperuntukan sebanyak RM25 juta bantuan kepada 119 pondok yang berdaftar dengan JAIN/MAIN bagi tujuan membangunkan dan menyelenggara fasiliti dan infrastruktur pendidikan. Manakala pada tahun 2017 Kerajaan telah memperuntukkan RM50 juta

kepada 129 buah institusi pondok dan 99 buah Sekolah Menengah Agama Rakyat (SMAR) berdaftar dan pada 2018 sebanyak RM25 juta diperuntukkan kepada 125 buah sekolah pondok dan 103 Sekolah Menengah Agama Rakyat (SMAR). Kerajaan dari semasa ke semasa akan meneruskan bantuan kepada institusi berkenaan dan ianya bergantung kepada kedudukan ekonomi semasa negara pada hari ini. Kerajaan Persekutuan bersama-sama pihak berkuasa agama negeri, pihak pengurusan institusi berkenaan serta agensi lain yang berkaitan seperti Jabatan Bomba dan Penyelamat, Pihak Berkuasa Tempatan (PBT) akan sentiasa bekerjasama dalam usaha untuk memastikan jaminan keselesaan dan keselamatan institusi tersebut.

Di samping itu, bagi meningkatkan dan menyelaraskan kurikulum institusi tersebut, kerajaan juga menyediakan inisiatif berikut :

- i. Menggalakkan sekolah pondok dan sekolah agama rakyat (SAR) berdaftar dengan Kementerian Pendidikan Malaysia sebagai Sekolah Agama Bantuan Kerajaan (SABK). Antara kebaikan berdaftar sebagai SABK ialah menerima bantuan bagi urusan pentadbiran sekolah, menerima bantuan modal bagi pembangunan fizikal sekolah, jawatan hakiki guru diwujudkan serta menerima guru yang terlatih.
- ii. Skim Pinjaman Buku Teks (SPBT) percuma bagi sekolah - sekolah pondok dan SAR yang melaksanakan Kurikulum Bersepadu Dini (KBD) dan Kurikulum Bersepadu Tahfiz (KBT) yang berdaftar dengan JAIN/MAIN.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : DATO' SERI DR. SHAHIDAN BIN**  
**KASSIM [ ARAU ]**  
**TARIKH : 25 OKTOBER 2018 (KHAMIS)**

**SOALAN NO.21**

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM DAN** menyatakan sebab mengapakah Jabatan Meteorologi Malaysia (MMD) gagal mengeluarkan amaran awal sebelum ribut melanda. Ini seperti kes yang berlaku di Perlis dan Kedah pada malam 17 September 2018 amaran pertama dikeluarkan MetMalaysia 9.50 malam di laman facebook rasmi manakala di laman sesawang rasmi pada jam 10.45 malam sedangkan ribut mula melanda dalam jam 9.00 malam.

**JAWAPAN**

Tuan Yang di-Pertua,

Sebagaimana kita sedia maklum, Malaysia merupakan sebuah negara yang terletak di kawasan tropika. Justeru, keadaan cuaca di Malaysia dipengaruhi oleh sistem berskala kecil seperti ribut petir dengan saiz antara 1 hingga 10 km dan tempoh hayat pendek sekitar 1 hingga 3 jam sahaja. Sistem cuaca sebegini sangat sukar untuk diramalkan dengan tepat dari segi lokasi dan masa.

Untuk makluman Yang Berhormat, sungguhpun ramalan cuaca di kawasan tropika lebih sukar namun Jabatan Meteorologi Malaysia (JMM) sentiasa berusaha dari semasa ke semasa untuk meningkatkan keupayaannya dalam pemantauan sistem cuaca berskala kecil dan bertempoh hayat pendek bagi membekalkan laporan cuaca yang lebih tepat.

Berikutan kejadian ribut yang berlaku di Perlis dan Kedah pada 17 September 2018, amaran ribut petir dan angin kencang telah dikeluarkan pada 09.50 malam mengikut Pelan Tetap Operasi Ramalan Cuaca MMD berdasarkan intensiti hujan yang dicerap oleh radar cuaca. Berdasarkan gema radar pada hari kejadian, intensiti hujan yang paling lebat di Perlis dan Kedah telah berlaku antara jam 10.00 hingga 11.00 malam.

Mengikut data cuaca yang direkodkan di enam stesen meteorologi kami di Perlis dan Kedah, iaitu di Stesen Meteorologi Langkawi, Chuping, Alor Setar, Taman Negeri Perlis, Bukit Raya (Kedah) dan Gajah Mati (Kedah), angin kencang melebihi  $10 \text{ ms}^{-1}$  mula bertiup di Langkawi pada 09.11 malam, diikuti dengan di Chuping pada 09.50 malam dan Alor Setar pada 10.23 malam, manakala di tiga stesen lain tidak menunjukkan adanya angin kencang berlaku di kawasan terbabit.

Rekod hujan pula menunjukkan ia mula turun di Langkawi pada 09.11 malam, diikuti dengan di Taman Negeri Perlis pada 09.38 malam dan Chuping pada 09.53, manakala tiga stesen lain di Kedah mula merekodkan hujan selepas pukul 10.30 malam. Hujan beransur reda selepas 11.30 malam di semua stesen terbabit dengan jumlah hujan terkumpul sepanjang tempoh pukul 09.00 malam sehingga 11.30 malam adalah antara 3.9 mm dan 30.4 mm, iaitu jumlah hujan yang boleh dikategorikan sebagai sedikit sehingga sederhana.

Amaran yang dikeluarkan pada 09.50 malam pada 17 September 2018 disediakan dengan menggunakan Sistem Penyediaan dan Penyebaran Maklumat MMD, dan amaran telah disebar kepada kumpulan sasar menggunakan faksimili, email, Sistem Pesanan Ringkas (SMS), Laman Web MMD dan laman sosial MMD, seperti *Facebook* dan *Tweeter* hampir pada masa sebenar. Log masa di pelayan laman web MMD menunjukkan amaran ribut petir dan angin kencang telah dipaparkan pada 09.57 malam mana kala di laman *Facebook* masa catatan amaran ini di siarkan adalah pada 09.55 malam.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB PUAN NURUL IZZAH BT. ANWAR  
(PERMATANG PAUH)**

**TARIKH : 25 OKTOBER 2018**

**SOALAN : 22**

**Puan Nurul Izzah binti Anwar [ Permatang Pauh ] minta MENTERI  
DALAM NEGERI menyatakan :-**

- (a) statistik penggunaan '*methadone*' oleh agensi Kerajaan (termasuk Agensi Antidadah Kebangsaan Malaysia) untuk membantu penyembuhan penagih dadah; dan
- (b) impak terkini inisiatif berterusan Kementerian untuk membantu penagih dadah yang ingin bersih sepenuhnya, termasuk pusat rehabilitasi '*Cure and Care*'.

**JAWAPAN:**

Tuan Yang Dipertua,

- a) Sejak diperkenalkan pada tahun 2005, program Rawatan Terapi Gantian (RTG) dengan menggunakan *methadone* telah dilaksanakan di pelbagai fasiliti Kerajaan dan swasta, iaitu di 891 buah fasiliti yang memberi perkhidmatan kepada 99,481 orang pada tahun 2017. Daripada jumlah ini, 522 buah fasiliti merupakan fasiliti Kerajaan yang terdiri daripada fasiliti Agensi Antidadah Kebangsaan (AADK), institusi Penjara, Hospital, Klinik Kesihatan di bawah Kementerian Kesihatan dan *University of Malaya Centre for Addiction Science Studies* (UMCAS) yang merawat sejumlah 93,512 orang.
- b) Kementerian Dalam Negeri amat memandang serius gejala penyalahgunaan dadah dan telah melaksanakan pelbagai langkah pencegahan dan pemulihan dadah. Program-program yang dilaksanakan juga bertujuan untuk membantu penagih-penagih dadah yang telah menjalani program pemulihan kekal pulih dan boleh kembali ke masyarakat dan hidup secara normal. Dalam pemantauan aspek kepulihan klien AADK, didapati bahawa sebanyak 60% daripada klien dapat mengekalkan kepulihan berbanding sasaran sebanyak 40% yang ditetapkan dalam *Key Performance Indicator* (KPI) Kementerian untuk tahun 2018.

Selain itu, daripada segi impak positif kepada Kerajaan, program RTG dengan menggunakan *methadone* merupakan salah satu program berlandaskan bukti (*evidence-based programme*) di bawah pendekatan pengurangan kemudaratan (*harm reduction*) yang telah diiktiraf oleh badan-badan antarabangsa seperti *World Health Organisation* (WHO). Program *harm reduction* ialah pendekatan yang komprehensif untuk mengurangkan kesan negatif daripada segi kesihatan, sosial dan ekonomi akibat penyalahgunaan dadah kepada individu, pengguna-pengguna dadah, keluarga dan masyarakat secara keseluruhan.

Kementerian Kesehatan dan AADK turut sama melaksanakan program rawatan tersebut dengan fokus utama bagi mengurangkan kesan negatif daripada segi kesihatan terutamanya penyakit HIV. Program yang menggunakan *methadone* ini dapat membantu penagih-penagih dadah jenis opiat seperti heroin dan *morphine* dengan membantu mengurangkan kesan tarikan ketagihan dadah jenis opiat dan membantu mengurangkan kesan psikologi serta emosi semasa proses pemulihan. Selain itu, pengambilan *methadone* dapat mengurangkan risiko jangkitan hepatitis B, C dan HIV atau AIDS melalui perkongsian jarum. *Methadone* yang memerlukan pemberian dos sekali sehari membolehkan klien menjalani kehidupan seharian tanpa memasukkan dadah dalam badan setiap 6-8 jam.

Program pemulihan, terutamanya melalui pendekatan psikososial yang dilaksanakan di bawah model *Cure and Care* AADK bersekali dengan Rawatan Terapi Gantian membolehkan seseorang individu mendapatkan pekerjaan yang stabil dan secara tidak langsung, meningkatkan taraf hidup klien, mengurangkan perlakuan jenayah dan membantu mengubah kehidupan klien menjadi lebih bermakna dan produktif.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN ARTHUR JOSEPH KURUP [PENSIANGAN]**

**TARIKH : 25 OKTOBER 2018 (KHAMIS)**

**SOALAN NO. 23**

**Tuan Arthur Joseph Kurup** minta **MENTERI BELIA DAN SUKAN** menyatakan apakah yang akan dilakukan terhadap lebih 60 ribu aspirasi dan cadangan di dalam Kanvas Belia TN50 yang telah dikumpulkan sepanjang dialog TN50 di seluruh negara sebelum ini.

**JAWAPAN**

Tuan Yang di-Pertua,

1. Kerajaan melalui pelbagai Kementerian akan menggarapkan lebih 60 ribu aspirasi yang telah dikumpulkan sebagai asas kepada merangka pelan pembangunan negara, pelaksanaan Wawasan 2020 dan seterusnya membentuk kerangka Rancangan Malaysia kedua belas (RMK-12). Selain itu, maklumat ini juga akan dijadikan panduan dalam perancangan kerajaan yang akan diterjemahkan ke dalam pembentukan polisi semua Kementerian selaras dengan pendekatan *bottom up*, khususnya di dalam perancangan pembangunan yang melibatkan belia.

Sekian, terima kasih.

**SOALAN NO. : 24**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG CHEN [ SUBANG ]**

**TARIKH : 25 OKTOBER 2018 (KHAMIS)**

**SOALAN NO. 24**

**Tuan Wong Chen [ Subang ] minta MENTERI AIR, TANAH DAN SUMBER  
ASLI menyatakan:**

- (i) kajian yang menyokong idea bahawa sianida selamat dan boleh digunakan untuk perlombongan; dan
- (ii) apakah langkah yang disyorkan untuk melindungi alam sekitar.

**JAWAPAN:**

Tuan Yang di-Pertua,

Penggunaan larutan sianida telah lama digunakan secara meluas di peringkat antarabangsa termasuk Malaysia.

Dalam konteks ini, Kerajaan menetapkan penggunaan larutan sianida dalam perlombongan emas perlu mengikut standard antarabangsa dan kebangsaan. Di peringkat Antarabangsa, perlombongan emas batuan keras (*hard rock mining*) yang menggunakan larutan sianida adalah tertakluk kepada *International Cyanide Management Code (Cyanide Code)* yang mana syarikat perlombongan emas batuan keras di Malaysia turut mengguna pakai sebagai rujukan dalam mengawalselia proses pengekstrakan emas di loji *heap leaching* masing-masing.

Dari sudut undang-undang pula, aktiviti tersebut dikawalselia melalui Peraturan-Peraturan Pembangunan Mineral (Efluen) 2016 di bawah Akta Pembangunan Mineral 1994. Jadual di bawah Peraturan-peraturan tersebut menetapkan had pelepasan efluen yang dibenarkan bagi sianida adalah tidak melebihi 0.2 mg/L (0.2 ppm).

Oleh itu, Kerajaan tidak bercadang untuk membuat kajian berhubung penggunaan sianida dalam perlombongan emas.



Tuan Yang di-Pertua,

Berhubung dengan langkah kawalan alam sekitar, aktiviti perlombongan emas di Malaysia perlu mematuhi syarat yang telah ditetapkan dalam Skim Pengendalian Melombong (*Operational Mining Scheme* - OMS) sebagaimana yang dikehendaki di bawah Peraturan-Peraturan Pembangunan Mineral (Skim Pengendalian Melombong, Pelan dan Buku Rekod) 2007 di bawah Akta Pembangunan Mineral 1994.

Selain itu, pengusaha turut diwajibkan untuk mengemukakan laporan pematuhan efluen secara berkala kepada JMG bagi memastikan isu pencemaran akibat penggunaan larutan sianida atau bahan lain tidak menjejaskan kesejahteraan penduduk setempat. Jabatan Mineral dan Geosains sentiasa mengawalselia dan memastikan semua standard-standard dipatuhi dan sepanjang pemantauan dilaksanakan kesemua lombong yang menggunakan larutan sianida didapati mematuhi semua standard yang telah ditetapkan.

Di samping itu, jabatan lain seperti Jabatan Alam Sekitar juga memantau perjalanan perlombongan emas dalam aspek alam sekitar seperti kualiti air dan udara.

Sekian, terima kasih.

**PARLIMEN MALAYSIA**  
**PEMBERITAHU PERTANYAAN DEWAN RAKYAT**

**PERTANYAAN : Lisan**

**DARIPADA : Dato' Dr. Haji Noor Azmi Bin Ghazali**  
**[Bagan Serai]**

**TARIKH : 25 Oktober 2018**

**SOALAN : Dato' Dr. Haji Noor Azmi Bin Ghazali [Bagan Serai] minta MENTERI PERTANIAN DAN INDUSTRI ASAS TANI** menyatakan apakah undang-undang yang diperuntukkan bagi menjaga kebajikan haiwan dilindungi ini telah diimplementasikan sepenuhnya dan dapat mengurangkan kes-kes penderaan haiwan.

**JAWAPAN**

Tuan Yang Dipertua,

Akta Kebajikan Haiwan 2015 (Akta 772) telah mula dikuatkuasakan pada 1 Julai 2017. Sebanyak lima (5) peraturan telah dibangunkan dan sedang berada di peringkat penelitian dan tindakan Pejabat Peguam Negara iaitu:

1. Pelesenan;
2. Notis Penambahbaikan;
3. Kompaun;
4. Pembantu Sukarela Kebajikan Haiwan; dan
5. Penggunaan Haiwan Dalam Ujian, Penyelidikan dan Pengajaran.

Selain itu, terdapat tiga (3) lagi peraturan yang sedang dibangunkan iaitu:

1. Pengangkutan Haiwan;
2. Prosedur Veterinar yang Diterima Pakai; dan
3. Pemilikan Haiwan yang Bertanggungjawab.

Bagi membolehkan penguatkuasaan penuh Akta ini, kesemua peraturan berkaitan perlu diwartakan oleh YB Menteri Pertanian dan Industri Asas Tani Malaysia setelah diluluskan oleh Pejabat Peguam Negara.

Sebagai tambahan, terdapat Seksyen tertentu dalam Akta ini yang boleh dikuatkuasakan tanpa adanya peraturan berkaitan. Sebagai contoh, Seksyen 29 menyatakan perbuatan-perbuatan yang dianggap zalim terhadap haiwan. Sehubungan itu, mana-mana orang yang didapati bersalah di bawah Seksyen ini boleh dikenakan hukuman minimum RM20,000.00 dan maksimum RM100,000.00 atau dipenjarakan selama tempoh tidak melebihi 3 tahun atau kedua-duanya.

Selain itu, Akta Binatang 1953 juga mempunyai peruntukan khusus berkaitan kezaliman terhadap haiwan. Dalam hal ini, setiap kes yang hendak disabitkan kesalahan di mahkamah akan dibuat penentuan oleh Timbalan Pendakwaraya samada hendak mengguna pakai Akta 772 atau Akta Binatang 1953 berdasarkan kepada tahap keseriusan kes. Ini adalah kerana hukuman di bawah Seksyen 44 Akta Binatang 1953 adalah jauh lebih ringan berbanding Akta 772. Sebagai contoh, Timbalan

## **SOALAN NO : 25**

Pendakwaraya telah memutuskan untuk menggunapakai Akta Binatang 1953, bagi satu kes dimana seorang kanak-kanak sekolah yang telah ditularkan videonya sedang menyepak seekor anak kucing. Ini kerana hukumannya lebih ringan memandangkan kanak-kanak tersebut masih terlalu muda dan berkemungkinan perbuatan tersebut adalah dianggap sebagai satu perkara yang tidak serius.

Sehubungan itu, ingin dijelaskan bahawa dengan adanya Akta ini yang memperuntukkan hukuman yang berat akan dapat memberi kesedaran kepada semua lapisan masyarakat dan seterusnya akan mengurangkan kes-kes penderaan haiwan di negara kita. Untuk tujuan tersebut, kempen kesedaran yang berterusan sentiasa diadakan di seluruh negara untuk memberi pendidikan kepada pemilik haiwan tentang keperluan menjadi pemilik haiwan yang lebih bertanggungjawab.

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN ALICE LAU KIONG YIENG [ LANANG ]**

**TARIKH : 25 OKTOBER 2018 (KHAMIS)**

**SOALAN NO: 26**

Minta **MENTERI PENDIDIKAN** menyatakan :-

- (a) peruntukan yang telah dan akan disalurkan untuk penambahbaikan atau pembaikpulihan sekolah-sekolah daif di Sarawak pada tahun 2013-2018; dan
- (b) sama ada Kerajaan Persekutuan akan mengambil pinjaman RM1 bilion yang ditawarkan oleh Kerajaan Negeri Sarawak baru-baru ini.

**JAWAPAN**

Tuan Yang di-Pertua,

- a) Pelaksanaan program pembangunan semula sekolah daif akan terus menjadi keutamaan dalam memastikan semua sekolah mencapai keperluan infrastruktur yang standard. Ini adalah bagi membolehkan pengajaran dan pembelajaran dapat dilaksanakan dengan lebih berkesan. Untuk makluman, peruntukan yang telah diluluskan bagi penambahbaikan atau pembaikpulihan sekolah-sekolah daif di Sarawak adalah seperti berikut:
- i. Program Baik pulih melibatkan 109 buah sekolah di Sarawak berjumlah RM29.924 juta telah diluluskan pada tahun 2016.
  - ii. Projek Pembinaan Bangunan Tambahan *Secara Industrialised Building System* (IBS) Serta Lain-Lain Kemudahan melibatkan 20 Projek di Sarawak berjumlah RM79.67 juta telah diluluskan pada tahun 2016, 2017 dan 2018.
  - iii. Pembinaan IBS di 183 Sekolah Daif (Sarawak) berjumlah RM323.26 juta telah diluluskan pada tahun 2017 dan 2018.
  - iv. Projek Pembangunan Semula Sekolah Daif di Sarawak berjumlah RM214.5 juta telah diluluskan pada tahun 2017 dan 2018.
- b) Kementerian Pendidikan Malaysia (KPM) maklum akan tawaran pinjaman RM1 bilion Kerajaan Negeri Sarawak kepada Kerajaan Persekutuan yang lama untuk kerja pembaikan sekolah daif di Sarawak. Tawaran tersebut dibuat dalam mesyuarat yang

dipengerusikan bersama oleh YAB Timbalan Perdana Menteri dan YAB Ketua Menteri Sarawak pada September 2017 di Sarawak.

Untuk makluman Ahli Yang Berhormat, memandangkan urusan pembaikan sekolah ini adalah di bawah tanggungjawab Kerajaan Persekutuan, sejumlah peruntukan telah disediakan untuk tujuan tersebut. Kerajaan pada masa itu melalui pembentangan Bajet 2018 telah meluluskan peruntukan sebanyak RM2.5 bilion untuk membaiki sekolah daif bagi tahun 2018 hingga 2019 menggunakan peruntukan *Private Financing Initiative 2A* (PFI 2A). Peruntukan RM2.5 bilion ini diperuntukkan untuk dua (2) tahun iaitu RM1.25 bilion bagi tahun 2018 dan RM1.25 billion bagi tahun 2019. Bagi RM1.25 bilion tahun 2018, peruntukan untuk pembaikan sekolah daif di Semenanjung Malaysia (RM250 juta), Sabah (RM500 juta) dan Sarawak (RM500 juta).

Pada tahun 2018, sebanyak 394 buah sekolah daif di seluruh negara terlibat dalam projek pembaikan atau naik taraf yang merangkumi sebanyak 158 buah di Semenanjung Malaysia, 120 buah di Sabah dan 116 buah di Sarawak. Berdasarkan rekod pada 20 September 2018, prestasi pelaksanaan projek bagi negeri Sarawak menunjukkan 64 projek telah siap dan 52 projek masih dalam pelaksanaan yang dijangka siap pada Disember 2018. Pihak KPM terus melaksanakan pemantauan rapi dan memantapkan kerjasama dengan semua pihak termasuk kerajaan negeri bagi memastikan semua projek berjalan lancar.

Sekian, terima kasih.

RJM42



**SOALAN NO. : 27**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK ROZMAN BIN ISLI [ LABUAN ]**

**TARIKH : 25 OKTOBER 2018**

**SOALAN NO.27**

**Datuk Rozman bin Isli [ Labuan ]** minta **MENTERI AIR, TANAH DAN SUMBER ASLI** menyatakan apakah status projek kawalan hakisan pantai di sepanjang Sungai Miri/Sungai Pagar dan Sungai Lada di WP Labuan yang mana ianya adalah perlu untuk diteruskan memandangkan hakisan yang sangat teruk sudah menghampiri jalan raya dan ianya adalah kawasan yang sesuai dibangunkan bagi tujuan pelancongan.

## **SOALAN NO.27**

### **JAWAPAN:**

Tuan Yang di-Pertua,

Projek telah diluluskan di dalam RMKe-11 di bawah peruntukan Hakisan Pantai Pelbagai Negeri. Perancangan dan reka bentuk sedang dilaksanakan di mana kerja-kerja ukur telah siap dilaksanakan di tapak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN CHANG LIH KANG (TANJONG MALIM)**

**TARIKH : 25 OKTOBER 2018**

**SOALAN : 28**

**Tuan Chang Lih Kang [ Tanjong Malim ] minta MENTERI DALAM NEGERI** menyatakan SOP penangkapan pekerja asing tanpa izin. Bagaimana Kementerian dapat mencegah pekerja asing dengan izin tidak turut ditangkap.

**JAWAPAN:**

Tuan Yang Di Pertua,

Setiap peringkat tindakan penguatkuasaan yang terbahagi kepada tiga peringkat iaitu aduan, risikan dan operasi adalah menggunakan modul Sistem Penguatkuasaan Jabatan Imigresen Malaysia yang dijadikan sebagai panduan kepada Pegawai Imigresen dalam menjalankan fungsi penguatkuasaan agar menghasilkan tindakan yang lebih terancang, teratur, efisien dan tangkapan yang berkualiti.

Semua pegawai dan anggota yang terlibat dalam operasi penguatkuasaan hendaklah memakai seragam yang lengkap, memperkenalkan diri serta mengemukakan kad kuasa jabatan sebelum pemeriksaan dijalankan sepertimana yang telah ditetapkan oleh pihak Pengurusan Tertinggi Jabatan Imigresen Malaysia. Anggota yang dipertanggungjawabkan untuk membawa senjata api adalah tertakluk di bawah prosedur pengendalian senjata api dan Akta Senjata Api 1960 dan Akta Senjata Api (Penalti Lebih Berat) 1971. Pergerakan pegawai / anggota hendaklah secara berkumpulan dan dilarang untuk melakukan kekerasan yang melampaui batas serta berhemah dan berintegriti dalam pengendalian terhadap Pendatang Asing Tanpa Izin (PATI) semasa operasi dijalankan. Pemeriksaan PATI hanya boleh dilakukan oleh pegawai / anggota berjantina yang sama.

Setiap tangkapan hendaklah berasaskan kepada seksyen kesalahan yang membawa kepada hukuman tertinggi atau paling berat jika disabitkan kesalahan. Semakan pertama ke atas dokumen, pas dan visa PATI akan dilakukan terdahulu menggunakan *mobile enforcement* di lapangan sebelum PATI dibawa ke pejabat Imigresen untuk tindakan selanjutnya. Mana-mana PATI yang diperiksa mempunyai dokumen dan pas yang sah dalam simpanan PATI sendiri setelah disemak akan dilepaskan tanpa dibawa ke pejabat Imigresen.

**SOALAN NO : 29**

**MESYUARAT KEDUA, PENGGAL PERTAMA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : LISAN**

**DARIPADA : YB DATO' HENRY SUM AGONG**

**KAWASAN : LAWAS**

**TARIKH : 25 OKTOBER 2018, KHAMIS**

**SOALAN :**

**YB DATO' HENRY SUM AGONG** minta **MENTERI KERJA RAYA** menyatakan dasar Kerajaan berhubung laluan Pan Borneo melalui Negara Brunei Darussalam.

**JAWAPAN :**

Tuan Yang Di-Pertua,

Untuk makluman Ahli Yang Berhormat, Kerajaan kini sedang menjalankan penelitian teknikal dan kewangan bagi jajaran alternatif Fasa 2 Lebuhraya Pan Borneo Sarawak tanpa melalui Negara Brunei Darussalam. Ini selaras dengan hasil lawatan YAB. Perdana Menteri di Negara Brunei Darussalam pada 2 hingga 3 September 2018 yang lalu di mana Kerajaan Malaysia secara prinsipnya telah bersetuju untuk meminda jajaran Fasa 2 Lebuhraya Pan Borneo Sarawak kepada satu jajaran alternatif yang tidak melalui Negara Brunei Darussalam.

Sekian, terima kasih.

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN KASTHURIRAANI A/P PATTO  
[ BATU KAWAN ]**

**TARIKH : 25 OKTOBER 2018 (KHAMIS)**

**SOALAN NO: 30**

Minta **MENTERI PENDIDIKAN** menyatakan sama ada Kementerian akan mengeluarkan ruang 'kaum' dan 'agama' dalam mana-mana dokumen peperiksaan UPSR, PT3, SPM, STPM, bagi pelajar sekolah rendah, menengah dan di tahap Universiti. Jika ya, bilakah Kementerian akan melakukannya dan jika tidak, mengapa.

**JAWAPAN**

Tuan Yang di-Pertua,

Untuk makluman Ahli Yang Berhormat, mulai tahun 2017 penggunaan istilah 'kaum' pada borang pendaftaran calon untuk menduduki peperiksaan dan pentaksiran pusat seperti Ujian Pencapaian Sekolah Rendah (UPSR), Pentaksiran Tingkatan 3 (PT3) dan Sijil Pelajaran Malaysia (SPM) telah digantikan dengan istilah 'keturunan', kerana istilah 'kaum' sebelum ini hanya merujuk kepada kaum Melayu, Cina, India dan Lain-lain, berbanding penggunaan istilah 'keturunan' lebih merujuk kepada suku kepada sesuatu bangsa. Perkataan 'agama' masih dikekalkan. Tujuannya untuk membolehkan pihak pengurusan mengenal pasti jumlah calon yang beragama Islam dan bukan Islam bagi memudahkan penyediaan kertas Pendidikan Islam dan Pendidikan Moral yang mencukupi untuk calon beragama Islam dan calon bukan Islam.

Manakala bagi peperiksaan Sijil Tinggi Persekolahan Malaysia (STPM) pula, tiada ruang 'agama' dalam mana-mana dokumen peperiksaan STPM, manakala ruang 'kaum' hanya ada dalam borang pendaftaran peperiksaan STPM. Kementerian tidak bercadang untuk mengeluarkan ruang 'kaum' dalam borang pendaftaran STPM kerana ruang tersebut diperlukan untuk tujuan analisis.

Sekian, terima kasih.

RJM43



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN CHARLES ANTHONY A/L SANTIAGO**  
**[KLANG]**  
**TARIKH : 25 OKTOBER 2018 (KHAMIS)**

**SOALAN NO. 31**

**Y.B. TUAN CHARLES ANTHONY A/L SANTIAGO [ KLANG ]** minta **MENTERI KEWANGAN** menyatakan sama ada ubat-ubat akan dikecualikan daripada *Sales and Service Tax* (SST) termasuk ubat kanser dan Hepatitis C.

**JAWAPAN**

Tuan Yang di-Pertua,

Di bawah sistem SST yang baharu, semua ubat-ubatan termasuk ubat kanser dan Hepatitis C telah dikecualikan dari dikenakan cukai jualan. Ubat yang diberi pengecualian cukai jualan adalah di dalam kategori *pharmaceutical and medicines* di bawah Bahagian 30.02, 30.03, 30.04 dan 30.05, Perintah Duti Kastam 2017 yang meliputi 141 baris tarif. Di samping itu, cukai jualan juga dikecualikan ke atas peralatan perubatan. Bagi pengilang tempatan yang terlibat dalam aktiviti pengeluaran produk farmaseutikal, pengecualian juga diberikan ke atas pembelian dan pengimportan bahan mentah, komponen dan bahan pembungkusan yang digunakan secara langsung seperti yang ditetapkan di bawah Butiran 2 Jadual B Peraturan-Peraturan Cukai Jualan (Orang Yang Dikecualikan Dari Membayar Cukai) 2018.

**PARLIMEN MALAYSIA**  
**PEMBERITAHU PERTANYAAN DEWAN RAKYAT**

**PERTANYAAN : Lisan**

**DARIPADA : Dato' Sri Haji Tajuddin bin Abdul Rahman**  
**[Pasir Salak]**

**TARIKH : 25 Okt 2018**

**SOALAN : Dato' Sri Haji Tajuddin bin Abdul Rahman**  
**[Pasir Salak] minta MENTERI PERTANIAN DAN INDUSTRI ASAS**  
**TANI** menyatakan status Projek Menaik Taraf Sistem Pengairan  
Jelapang Padi Sg. Manik.

**JAWAPAN**

**Tuan Yang Dipertua,**

Sebanyak Enam projek telah diluluskan bagi Projek Menaiktaraf Sistem Pengairan Jelapang Padi Sungai Manik di dalam Rancangan Malaysia Ke-11. Daripada enam projek tersebut, dua projek telah disiapkan dan satu projek masih dalam pembinaan. Tiga projek lagi masih di peringkat akhir kajian perunding. Projek – projek yang telah siap dan dalam pembinaan serta kajian adalah seperti berikut :-

1. Projek Menaiktaraf Sistem Saliran Pengairan Sungai Manik, Fasa 1, Daerah Hilir Perak, Perak Darul Ridzuan **telah siap dibina;**
2. Kerja-Kerja Menaiktaraf Sistem Tersier Taliair 3B Serta Kerja-Kerja Berkaitan Di Skim Pengairan Sungai Manik, IADA Seberang Perak **telah siap dibina.**
3. Kerja-kerja Menaiktaraf Taliair Kedua TA1, TA-2 dan TA-5 Di Skim Pengairan Sungai Manik, Daerah Hilir Perak, Perak Darul Ridzuan **dalam peringkat pembinaan.**

Manakala projek – projek yang masih di peringkat kajian adalah seperti berikut:-

4. Rekabentuk Terperinci Untuk Projek Menaiktaraf Terusan Utama (RMC Dan LMC) Serta Kerja-Kerja Yang Berkaitan Di Skim Pengairan Sungai Manik IADA Seberang Perak **dalam peringkat kajian terakhir;**
5. Rekabentuk terperinci untuk Projek Menaiktaraf Taliair Tersier di Skim Pengairan Sungai Manik, IADA Seberang Perak; dan
6. Kajian Menaiktaraf Kolam Takungan Tronoh, Rancangan Pengairan Sungai Manik, Perak

**SOALAN NO : 32**

Status Projek-projek Menaik Taraf Sistem Pengairan Sg. Manik adalah seperti berikut :

<b>Nama Projek</b>	<b>Kos Keseluruhan</b>	<b>Status</b>
1. Projek Menaiktaraf Sistem Saliran Pengairan Sungai Manik, Fasa 1, Daerah Hilir Perak, Perak Darul Ridzuan	RM 1,759,648.16	Siap dibina
2. Kerja-Kerja Menaiktaraf Sistem Tersier Taliair 3B Serta Kerja-Kerja Berkaitan Di Skim Pengairan Sungai Manik, IADA Seberang Perak	RM 6,731,000.00	Siap dibina
3. Kerja-kerja Menaiktaraf Taliair Kedua TA1, TA-2 dan TA-5 Di Skim Pengairan Sungai Manik, Daerah Hilir Perak, Perak Darul Ridzuan	RM 29,655,209.78	Dalam peringkat pembinaan
4. Rekabentuk Terperinci Untuk Projek Menaiktaraf Terusan Utama (RMC Dan LMC) Serta Kerja-Kerja Yang Berkaitan Di Skim Pengairan Sungai Manik Iada Seberang Perak	RM 1,034,519.72	Dalam peringkat kajian
5. Rekabentuk terperinci untuk Projek Menaiktaraf Taliair Tersier di Skim Pengairan Sungai Manik, IADA Seberang Perak, Perak	RM 522,524.35	Dalam peringkat kajian
6. Kajian Menaiktaraf Kolam Takungan Tronoh,Rancangan Pengairan Sungai Manik,Perak	RM 763,282.26	Dalam peringkat kajian
<b>Jumlah</b>	<b>RM 40,466,184.27</b>	

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

PERTANYAAN : LISAN

DARIPADA : YB DATUK SERI M. SARAVANAN

TARIKH : 25 OKTOBER 2018

SOALAN :

**Datuk Seri M. Saravanan [ Tapah ]** minta **MENTERI TENAGA MANUSIA** menyatakan adakah pihak Kementerian akan terus mengekalkan gaji minimum RM1,050 baru-baru ini atau akan mengkaji semula sepertimana gaji minimum RM1,500.

PR-1412-L02794

## **JAWAPAN**

Tuan Yang Di Pertua,

1. Kerajaan baru-baru ini telah memutuskan untuk menetapkan satu kadar gaji minimum seragam iaitu RM1050 sebulan mulai 1 Januari 2019. Penetapan kadar gaji minimum baharu yang seragam di seluruh negara adalah selaras dengan 10 janji Kerajaan dalam 100 hari pertama pemerintahan seperti dinyatakan dalam manifesto Pakatan Harapan yang bertujuan untuk memastikan rakyat mendapat hak yang sama rata dari aspek gaji tanpa mengira wilayah. Keputusan ini dibuat selepas mengambil kira proses pemulihan ekonomi negara, indikator-indikator ekonomi yang dijadikan asas penetapan kadar dan sokongan dasar-dasar lain dalam memastikan rakyat sentiasa menjadi keutamaan Kerajaan.

2. Secara amalnya Kajian Semula Perintah Gaji Minimum akan dibuat oleh Majlis Perundingan Gaji Negara (MPGN) sekurang-kurangnya sekali dalam tempoh 2 tahun selaras dengan peruntukan Akta Majlis Perundingan Gaji Negara 2011 (Akta 732).

3. Kesimpulannya Kerajaan percaya sekiranya ekonomi negara berada di landasan yang baik, sasaran gaji minimum RM1,500 menjelang akhir penggal pertama pemerintahan Kerajaan pasti dapat dicapai. Di samping itu, Kerajaan akan memastikan langkah-langkah lain juga akan digerakkan agar kebajikan rakyat tetap didahulukan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPATBELAS**

---

**PERTANYAAN : LISAN**

**DARIPADA : YB TUAN CHAN MING KAI (ALOR SETAR)**

**TARIKH : 25 OKTOBER 2018**

**SOALAN : 34**

**Tuan Chan Ming Kai [ Alor Setar ] minta MENTERI DALAM NEGERI** menyatakan perkembangan pemberian status kewarganegaraan kepada pemegang kad pengenalan merah dan berstatus pemastautin tetap berusia 60 tahun ke atas setakat ini.



**JAWAPAN:**

Tuan Yang di-Pertua,

Untuk makluman Dewan Yang Mulia ini, berhubung dengan pertanyaan Ahli Yang Berhormat mengenai prosedur pemprosesan permohonan kewarganegaraan, dimaklumkan bahawa prosedur operasi standard (SOP) bagi permohonan kewarganegaraan Malaysia adalah berpandukan kepada senarai semak yang diperincikan daripada peruntukan di bawah Bahagian III, Perlembagaan Persekutuan serta Kaedah-Kaedah Kewarganegaraan 1964 (Pindaan 1996). Bahagian III, Perlembagaan Persekutuan telah menetapkan tiga (3) kaedah pemerolehan kewarganegaraan Malaysia iaitu secara kuat kuasa undang-undang, pendaftaran atau penaturalisasian. Bagi warga asing, permohonan kewarganegaraan Malaysia boleh dikemukakan sama ada secara pendaftaran atau penaturalisasian.

Setiap permohonan kewarganegaraan yang diterima oleh Kementerian Dalam Negeri (KDN) akan diproses dengan teliti dalam memastikan setiap permohonan berkenaan memenuhi syarat-syarat perundangan yang ditetapkan oleh Perlembagaan Persekutuan. Syarat-syarat utama yang perlu dipenuhi adalah cukup tempoh mastautin sekurang-kurangnya 12 tahun dari tarikh pegangan Kad Pengenalan Pemastautin Tetap MyPR dan telah menunjukkan niat untuk bermastautin, mempunyai pengetahuan dalam Bahasa Melayu serta mestilah berkelakuan baik. Beban untuk membuktikan kelayakan untuk dianugerahkan kewarganegaraan Malaysia ini adalah di bawah tanggungjawab setiap pemohon.

Setelah selesai proses pertimbangan dan jika permohonan diluluskan, pemohon perlu hadir ke pejabat Jabatan Pendaftaran Negara (JPN) dengan membawa surat kelulusan yang dikeluarkan sama ada oleh KDN atau JPN untuk prosedur mengangkat sumpah dan membuat bayaran pengeluaran Sijil Kewarganegaraan. Setelah Sijil Kewarganegaraan dikeluarkan, pemohon layak bergelar seorang warganegara Malaysia.

Adalah ditegaskan bahawa taraf kewarganegaraan Malaysia merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Sehubungan dengan itu, setiap pertimbangan serta keputusan dibuat dengan teliti dan menyeluruh. Ini adalah bagi memastikan kewarganegaraan dianugerahkan kepada individu yang berkeelayakan, dapat memberikan sumbangan signifikan kepada negara serta menumpahkan taat setia kepada Seri Paduka Baginda Yang di-Pertuan Agong tanpa mengabaikan kepentingan nasional serta keselamatan dan kesejahteraan warganegara sedia ada.

Susulan daripada pengumuman YAB Perdana Menteri pada 14 Ogos 2018 mengenai penganugerahan kewarganegaraan kepada pemegang Kad Pengenalan Pemastautin Tetap MyPR berumur 60 tahun dan ke atas yang telah memenuhi syarat yang ditetapkan oleh Perlembagaan Persekutuan, KDN sedang melaksanakan tindakan segera terhadap arahan berkenaan secara berperingkat dan selaras dengan peruntukan perundangan di bawah Perlembagaan Persekutuan.

Sehubungan dengan itu, KDN telah menambahbaik dan memberi kelonggaran bersesuaian dalam pertimbangan terhadap permohonan pemegang Kad Pengenalan Pemastautin Tetap MyPR berumur 60 tahun dan ke atas dengan mengambil kira aspek kemanusiaan seperti berikut:-

- (i) Pengecualian Komponen Membaca dan Menulis bagi Ujian Pengetahuan Bahasa Melayu (UPBM) serta pertimbangan untuk kelulusan walaupun mereka mendapat gred terendah dalam ujian tersebut; dan
- (ii) Pemohon yang gagal Tapisan Keselamatan oleh PDRM masih dipertimbangkan untuk kelulusan sekiranya kesalahan bukanlah dalam kategori jenayah berat, jenayah professional dan jenayah terancang serta kesalahan tersebut telah melebihi 20 tahun.

Buat masa ini, KDN dalam tindakan menyelesaikan isu kewarganegaraan individu berketurunan India selaras dengan Manifesto 100 Hari Kerajaan dalam pilihan raya ke-14 baru-baru ini dan KDN telahpun selesai memproses semua permohonan kewarganegaraan daripada individu pemegang Kad Pengenalan Pemastautin Tetap MyPR berketurunan India berumur 60 tahun dan ke atas yang telah diterima dari tempoh 2013 sehingga Mei 2018 berjumlah sebanyak 1,667 permohonan dengan 1,641 permohonan telah diluluskan dan 26 permohonan telah ditolak kerana tidak memenuhi syarat yang ditetapkan dalam Perlembagaan Persekutuan.

Kementerian ini juga melalui JPN sentiasa mengambil langkah proaktif dalam memastikan pendaftaran dokumen pengenalan diri individu yang berkecukupan dapat dilaksanakan dengan mudah di seluruh negara melalui inisiatif berterusan seperti mana berikut:-

- (i) Perkhidmatan menerusi Program Turun Padang (Program *Outreach*);
- (ii) Perkhidmatan melalui Unit *Mobile*; dan
- (iii) Perkhidmatan melalui Bas *Mobile*.

Selain daripada itu, pada 9 Oktober 2018 KDN telah mengadakan satu Sesi Perjumpaan Bersama Wakil-Wakil Rakyat India Berkenaan Isu Dokumen Pengenalan Diri dan Kewarganegaraan Masyarakat India. Sesi perjumpaan ini telah dihadiri oleh lapan (8) orang Ahli Parlimen dan Ahli Dewan Undangan Negeri yang diketuai oleh YB Sivarasa Rasiah, Timbalan Menteri Pembangunan Luar Bandar selaku Ketua Sekretariat. Hasil daripada sesi perjumpaan ini, pelbagai perkara telah dibincangkan dan memberikan perspektif yang baru kepada kedua-dua belah pihak mengenai isu dokumen pengenalan diri dan kewarganegaraan masyarakat India.

Satu Majlis Penyampaian Surat Kelulusan Kewarganegaraan oleh YB Menteri Dalam Negeri diadakan pada 25 Oktober 2018 di Jabatan Pendaftaran Negara, Putrajaya. Seramai 200 orang pemohon telah

**SOALAN : 34**

menerima surat kelulusan kewarganegaraan Malaysia di bawah Perkara 19(1), Perkara 16 dan Perkara 15(1) Perlembagaan Persekutuan.

**PARLIMEN MALAYSIA**  
**PEMBERITAHU PERTANYAAN DEWAN RAKYAT**

**PERTANYAAN : LISAN**

**DARIPADA : Tuan Kesavan a/l Subramaniam [Sungai Siput]**

**TARIKH : 25 Oktober 2018**

**SOALAN : Tuan Kesavan A/L Subramaniam [Sungai Siput] minta MENTERI PERTANIAN DAN INDUSTRI ASAS TANI** menyatakan adakah Kementerian sedar bahawa Ladang Info Ternak yang terletak di Sungai Siput boleh menjadi tumpuan pelancongan sebagai pusat Agro-Tourism yang mana sebelum ini Hari Peladang Peringkat Kebangsaan kerap diadakan di sini kerana kawasannya yang luas dan lapang di samping terdapat kemudahan asas sebelum berpindah ke RTC Gopeng. Adakah Kementerian bercadang untuk mempertimbang-kan semula dan menaiktaraf Ladang ini sebagai pusat pelancongan Agro-Tourism.

**JAWAPAN**

**Tuan Yang Dipertua,**

Sebagaimana Ahli Yang Berhormat sedia maklum, Ladang Info Ternak di Sungai Siput adalah sebuah pusat latihan ternakan Kerajaan Negeri yang diselia oleh Jabatan Perkhidmatan Veterinar (DVS) Negeri Perak. Ia telah dibangunkan pada tahun 1972 untuk memberi latihan asas dan latihan lanjutan berkaitan bidang penternakan khususnya kepada penternak-penternak di negeri Perak. Pembangunan agropelancongan di Ladang Info Ternak pula telah bermula pada tahun 1998.

Ladang Info Ternak pernah dipilih sebagai lokasi Hari Peladang, Penternak dan Nelayan Peringkat Kebangsaan pada tahun 2001 dan tapak tetap Hari Peladang, Penternak dan Nelayan peringkat Negeri

## **SOALAN NO : 35**

Perak selama 10 tahun berturut-turut iaitu dari tahun 2000 hingga 2010 dan pada tahun 2013. Sekitar tahun 2001 hingga 2005, ladang ini juga telah dimasukkan sebagai salah satu destinasi dalam Kalendar Pelancongan Negeri Perak.

Sebagai sebuah pusat agropelancongan berkonsepkan ternakan dan pembelajaran kepada pengunjung, DVS Negeri Perak telah memanfaatkan spesis ternakan serta kemudahan latihan yang terdapat di Ladang Info Ternak untuk menarik pengunjung.

Kementerian Pertanian dan Industri Asas Tani (MOA) dimaklumkan bahawa pada Tahun 2017, Majlis Tindakan Ekonomi Negeri (MTEN) Perak telah meluluskan peruntukan berjumlah RM150,000 di bawah skop pelancongan bagi tujuan menaiktaraf kemudahan Unit Burung Unta dan landskap di Ladang Info Ternak ini. Peruntukan tersebut telah disalurkan kepada DVS Negeri Perak pada awal tahun 2018 dan kerja-kerja menaiktaraf sedang dijalankan.

Data yang diperolehi daripada DVS Negeri Perak menunjukkan penurunan dari segi jumlah kedatangan pengunjung dalam tempoh enam (6) tahun iaitu 5,537 orang pada tahun 2012 kepada 1,674 orang pada tahun 2017.

Kementerian melalui DVS Negeri Perak akan menjalankan kajian penilaian dan penelitian yang khusus terhadap potensi, konsep dan kaedah pelaksanaan ladang berkenaan. Justeru, kajian tersebut akan menentukan hala tuju dan pembangunan ladang ini selanjutnya. Ini adalah kerana konsep dan kaedah pelaksanaan Ladang Info Ternak telah berjalan lebih daripada 20 tahun dan pada masa ini perkembangannya semakin perlahan dan kurang memberangsangkan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHOW KON YEOW  
[ TANJONG ]**

**TARIKH : 25 OKTOBER 2018 (KHAMIS)**

**SOALAN NO. 33**

Minta **MENTERI PENGANGKUTAN** menyatakan adakah Terminal Penerbangan Tambang Murah (LCCT) baru akan dibina bersama-sama pembesaran Lapangan Terbang Antarabangsa Pulau Pinang (PIA). Jelaskan model kewangan membabitkan swasta dalam projek penarafan ini. Adakah bakal membabitkan pengambilan tanah.

**JAWAPAN**

Yang Dipertua,

1. Untuk makluman Yang Berhormat, Lapangan Terbang Antarabangsa Pulau Pinang (LTAPP) sedia ada direkabentuk untuk menampung pengendalian 6.5 juta penumpang setahun. Namun jumlah penumpang yang dikendalikan pada tahun 2017 di LTAPP telah mencapai sebanyak 7.2 juta penumpang iaitu 111% daripada kapasiti sedia ada.
2. Dalam hubungan ini, Kementerian Pengangkutan komited untuk menyelesaikan masalah kekurangan kapasiti di LTAPP. Kementerian Pengangkutan sedang mempertimbangkan beberapa opsyen untuk memperbesarkan LTAPP dengan meneroka beberapa pilihan termasuk membangunkan ruang tambahan untuk operasi syarikat penerbangan perkhidmatan penuh dan penerbangan tambang murah di bangunan terminal sedia ada. Pembangunan ruang tambahan ini akan meningkatkan kapasiti pengendalian terminal LTAPP daripada 6.5 juta penumpang kepada 12 juta penumpang setahun.
3. Bagi menampung kos pembesaran LTAPP, Kementerian Pengangkutan, Kementerian Kewangan bersama-sama MAHB sedang mengkaji model pembangunan dan kaedah pembiayaan yang sesuai agar projek pembesaran ini dapat dilaksanakan dengan cara yang *cost effective*.
4. Untuk makluman, buat masa ini, tiada pengambilan tanah akan dilakukan bagi melaksanakan projek ini kerana tanah sedia mencukupi.

Sekian, terima kasih



**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ABD RAHIM BIN BAKRI [ KUDAT ]**

**TARIKH : 25 OKTOBER 2018 (KHAMIS)**

**SOALAN NO: 37**

Minta **MENTERI PENDIDIKAN** menyatakan apakah status pelaksanaan projek SMK Kanibongam, Pitas. Kenapa projek tersebut masih tidak mampu disiapkan sehingga kini dan apakah tindakan yang dilakukan Kementerian untuk menyelesaikan masalah ini.

**JAWAPAN**

Tuan Yang di-Pertua,

Sehingga 24 September 2018, kemajuan kerja di tapak projek SMK Kanibongam ialah 53.18 peratus berbanding jadual 94.48 peratus. Projek ini telah mengalami kelewatan sebanyak 40.30 peratus. Punca kelewatan pelaksanaan projek ini yang dikenal pasti adalah disebabkan oleh faktor perbekalan sistem *Industrialised Building System* (IBS), faktor cuaca, kekurangan pekerja serta pengurusan kontraktual.

Projek ini dipantau dan dilaporkan dalam mesyuarat berkala di peringkat Kementerian bersama pihak pengurusan tertinggi Kementerian Pendidikan Malaysia (KPM). Pemantauan secara mingguan ke atas projek ini juga turut dilaksanakan. Kegagalan kontraktor untuk menyiapkan projek dalam tempoh pelanjutan masa yang ditetapkan akan menyebabkan kontraktor dikenakan *Liquidated and Ascertained Damages* (LAD) atau ditamatkan kontrak.

Sekian, terima kasih.

RJM45

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : TUAN AHMAD FAHMI BIN MOHAMED FADZIL  
[LEMBAH PANTAI]**

**TARIKH : 25 OKTOBER 2018**

**SOALAN : 38**

**Tuan Ahmad Fahmi bin Mohamed Fadzil [Lembah Pantai]** minta **PERDANA MENTERI** menyatakan langkah-langkah yang akan diambil Kerajaan bagi mengurangkan had umur pendaftaran pemilih baru ke 18 tahun serta mewujudkan proses pendaftaran pemilih secara automatik.

**JAWAPAN:      YB DATUK LIEW VUI KEONG**

**MENTERI DI JABATAN PERDANA MENTERI**

Tuan Yang di-Pertua,

Seperti mana Ahli Yang Berhormat sedia maklum, Kerajaan secara prinsipnya telah meluluskan cadangan untuk menurunkan umur layak mendaftar sebagai pemilih dari umur 21 tahun kepada 18 tahun. Selaras dengan keputusan tersebut, Suruhanjaya Pilihan Raya (SPR) sedang **mengadakan kerjasama dengan Kementerian Belia dan Sukan, Jabatan Peguam Negara dan Jawatankuasa Pembaikan Sistem dan Undang-Undang Pilihan Raya Malaysia (*Electoral Reform Committee - ERC*)** untuk meneliti pindaan undang-undang yang terlibat termasuk pindaan kepada undang-undang sedia ada.

Berhubung dengan cadangan pelaksanaan urusan pendaftaran pemilih secara automatik, SPR **sedang meneliti berkaitan perkara tersebut** di mana ia akan melibatkan cadangan pindaan kepada undang-undang sedia ada, perubahan proses dan prosedur kerja urusan pendaftaran pemilih, keperluan sistem dan peralatan serta implikasi kewangan.

Sekian, terima kasih.

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. HASAN BIN BAHROM [ TAMPIN ]**

**TARIKH : 25 OKTOBER 2018 (KHAMIS)**

**SOALAN NO: 39**

Minta **MENTERI PENDIDIKAN** menyatakan kedudukan mengenai pembangunan Kampus Pertanian, Universiti Malaya yang telah dimasukkan ke dalam pelan pembangunan Daerah Kecil Gemas.

**JAWAPAN**

Tuan Yang di-Pertua,

Untuk makluman Ahli Yang Berhormat, Kampus Pertanian Universiti Malaya telah dijenamakan semula ke Pusat Agrosains Universiti Malaya.

Universiti Malaya (UM) telah memperolehi tanah seluas 200 Ekar (80 Hektar) no geran PT1846 di daerah kecil Gemas daripada Kerajaan Negeri Sembilan dengan bayaran premium lebih kurang RM5 Juta.

Projek pembangunan Pusat Agrosains dilaksanakan melalui dua fasa. Fasa I melibatkan pembersihan tanah, memasang pagar, pembinaan kolam tadahan, pengairan dan projek penanaman pokok. Pada masa ini proses melibatkan pembersihan tanah, memasang pagar, pembinaan kolam tadahan telahpun selesai dijalankan. Manakala penyediaan sistem pengairan, pembinaan kontena sebagai pejabat ladang dan penanaman pokok sedang dijalankan. Dana pembangunan bagi Fasa I ini adalah menggunakan dana UM sendiri.

Dalam Fasa II pula, ia melibatkan pembinaan infrastruktur termasuk jalanraya sepanjang 2.5 km, pembinaan tangki air domestik berkapasiti 5 juta liter dan pembinaan blok utama yang akan menempatkan ruang pejabat, makmal, bilik seminar, bilik mesyuarat, bilik kakitangan dan bilik pasca-siswazah. Untuk makluman Ahli Yang Berhormat, Pembangunan Fasa II ditangguhkan atas faktor ketiadaan dana.

**SOALAN NO : 40**

**MESYUARAT KEDUA, PENGGAL PERTAMA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : LISAN**

**DARIPADA : YB DATUK SERI PANGLIMA DR. MAXIMUS JOHNITY  
ONGKILI**

**KAWASAN : KOTA MARUDU**

**TARIKH : 25 OKTOBER 2018, KHAMIS**

**SOALAN :**

**YB DATUK SERI PANGLIMA DR. MAXIMUS JOHNITY ONGKILI** minta **MENTERI KERJA RAYA** menyatakan apakah status terkini pelaksanaan projek-projek Pan Borneo di Sabah. Berapa projek yang telah dimulakan, berapa yang siap, berapa yang ditangguhkan, berapa yang dibatalkan dan setakat ini berapa jumlah peruntukan yang telah dibelanjakan daripada jumlah bajet yang diluluskan.

**JAWAPAN :**

Tuan Yang Di-Pertua,

Sebagaimana Ahli Yang Berhormat sedia maklum, pelaksanaan Fasa 1 projek Lebuhraya Pan Borneo Sabah adalah melibatkan keseluruhan anggaran jarak 706 km yang dipecahkan kepada 35 pakej kerja dengan anggaran awal kos pembinaan sebanyak RM12.86 bilion. Sehingga kini, sebanyak 12 pakej kerja telah dibuat pelantikan kontraktor dan sedang dalam peringkat pembinaan. Secara keseluruhannya, status kemajuan pembinaan ialah di antara 1% hingga 39%. Sehingga September 2018, Kerajaan telah membelanjakan sebanyak RM1.046 bilion untuk pelaksanaan projek Lebuhraya Pan Borneo Sabah. Ini termasuklah bayaran yang melibatkan Kontraktor Pakej Kerja (*Work Package Contractor – WPC*), imbuhan balik Rakan Pelaksana Projek (*Projek Delivery Partner – PDP*), yuran PDP dan pengambilan balik tanah.

Untuk makluman Ahli Yang Berhormat, mekanisme dan pelaksanaan projek Lebuhraya Pan Borneo Sabah sedang dalam peringkat akhir untuk dimuktamadkan oleh Kerajaan Pusat.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB TUAN YUSUF BIN ABD. WAHAB**  
**[ TANJONG MANIS ]**  
**TARIKH : 25 OKTOBER 2018 (KHAMIS)**

**SOALAN NO. 41**

Minta **MENTERI KESIHATAN** menyatakan apakah nisbah penduduk untuk setiap hospital atau klinik di kawasan luar bandar dan adakah perancangan Kerajaan untuk membina sebuah Hospital di Bandar Baru Tanjong Manis memandangkan kawasan berhampiran dengan banyak kampung dan rumah panjang dan sebuah Klinik di kawasan selatan Pulau Bruit, berhampiran Kampung Semop kerana tiada kemudahan klinik di kawasan tersebut.

**JAWAPAN**

**Yang di-Pertua,**

Pembinaan sesebuah hospital dan klinik kesihatan sememangnya mengambilkira nisbah bilangan penduduk bagi sesuatu kawasan. Sebagai contoh, pembinaan sesebuah hospital boleh dipertimbangkan bagi kawasan yang mempunyai penduduk seramai **50,000-100,000** orang, sementara untuk sesebuah klinik kesihatan adalah antara **3000-5000** orang penduduk.

Secara umumnya, pembinaan sesebuah fasiliti kesihatan samada hospital atau klinik adalah tertakluk kepada berbagai faktor lain termasuklah keadaan fizikal kemudahan fasiliti sediada, jarak ke kemudahan sediada dan status kesihatan penduduk setempat. Buat masa ini, penduduk Tanjung Manis seramai **10,000** orang mendapatkan perkhidmatan perubatan di Hospital Sibu.

Di kawasan Tanjung Manis ini telah terdapat tiga buah klinik kesihatan yang berdekatan iaitu **Klinik Kesihatan Tekajong (KK6), Klinik Kesihatan Betanak (KK6) dan Klinik Kesihatan Bruit (KK6)** yang mempunyai kemudahan rawatan pesakit dalam bagi merawat kes-kes ringan (Observation Ward). Jarak perjalanan darat dari Tanjung Manis ke Klinik Kesihatan Tekajong adalah sejauh 4km, ke Klinik Kesihatan Betanak sejauh 8km dan ke Klinik Kesihatan Bruit pula sejauh 13km.

Untuk Makluman Tuan Yang di-Pertua, dalam RMKe-10 Kerajaan telah pun meluluskan projek pembinaan sebuah klinik kesihatan di **Kampung Semop, Mukah (KK 6)** yang terletak berhampiran dengan Tanjung Manis. Ianya sedang dalam proses tender dan kerja-kerja pembinaan dijangka akan dimulakan dalam pertengahan tahun hadapan.

Sehubungan itu, KKM tidak mempunyai perancangan untuk membina sebuah hospital di kawasan Tanjung Manis.

**PARLIMEN MALAYSIA**  
**PEMBERITAHU PERTANYAAN DEWAN RAKYAT**

**PERTANYAAN : Lisan**

**DARIPADA : Dato' Dr. Shamsul Anuar bin Haji Nasarah**  
**[ Lenggong ]**

**TARIKH : 25 Oktober 2018**

**SOALAN : Dato' Dr. Shamsul Anuar bin Haji Nasarah minta**  
**MENTERI PERTANIAN DAN INDUSTRI ASAS TANI** menyatakan  
apakah **inisiatif** yang telah dirangka oleh Kementerian dalam **membantu**  
**mengurangkan bebanan kos sara hidup** golongan nelayan selain  
daripada menanam nanas mahupun tanaman lain di belakang rumah.

**JAWAPAN**

**Tuan Yang Dipertua,**

Untuk makluman Ahli Yang Berhormat, Kementerian melalui Jabatan Perikanan Malaysia dan Lembaga Kemajuan Ikan Malaysia telah merangka dan melaksanakan pelbagai inisiatif bagi membantu mengurangkan kos sara hidup di samping meningkatkan pendapatan golongan nelayan seperti berikut:

- (i) Pemberian bantuan dan insentif dalam bentuk tunai atau subsidi serta *touch-point* peralatan menangkap ikan / peralatan keselamatan;
- (ii) Mempelbagaikan ekonomi nelayan melalui penglibatan persatuan nelayan dalam rangkaian sistem *upstream* dan *downstream* perikanan serta aktiviti komuniti di bawah program myKomuniti Perikanan;

## SOALAN NO: 42

- (iii) Memperkasakan kemahiran nelayan tempatan melalui latihan pengendalian vesel dan alat penangkapan ikan bagi menguruskan kos operasi pembaikan vesel dan alatan secara *self-service*;
- (iv) Menggalakkan keterlibatan nelayan di dalam aktiviti akuakultur secara kluster bagi meningkatkan nilai pengeluaran dan jaminan pasaran;
- (v) Membangunkan aktiviti industri asas tani dan pemprosesan berasaskan produk perikanan bagi meningkatkan kedudukan ekonomi Kumpulan Nelayan Wanita (KUNITA);
- (vi) Meningkatkan modal insan dan pendapatan Kumpulan Belia Nelayan (KUBENA) melalui aktiviti keusahawanan, agropelancongan dan perkhidmatan; dan
- (vii) Menggalakkan rangkaian pemasaran dan pengedaran hasil tangkapan ikan secara jualan terus kepada pengguna dengan memperkenalkan Program Ikan Sejuk Beku Q'Fish dan Program Jualan Ikan Segar bagi mengurangkan beban kos sara hidup rakyat.

**PEMBERITAHUAN PERTANYAAN BAGI JAWAPAN LISAN**

**MESYUARAT KEDUA, DEWAN RAKYAT**

**PENGGAL PERTAMA, PARLIMEN KEEMPAT BELAS**

**MAJLIS MESYUARAT DEWAN RAKYAT**

**PERTANYAAN : JAWAB LISAN**

**DARIPADA : DATUK WIRA HAJAH MAS ERMIEYATI BINTI  
SAMSUDIN [ MASJID TANAH ]**

**TARIKH : 25 OKTOBER 2018 (KHAMIS)**

**SOALAN :**

**Datuk Wira Hajah Mas Ermieyati binti Samsudin [ Masjid Tanah ]  
minta MENTERI PEMBANGUNAN WANITA, KELUARGA DAN  
MASYARAKAT** apakah langkah yang diambil oleh Kementerian dalam  
menggalakkan kaedah penggunaan kontraseptif dalam usaha  
mengurangkan isi rumah miskin.

**JAWAPAN: YAB DATO' SERI DR. WAN AZIZAH DR. WAN ISMAIL,**  
**TIMBALAN PERDANA MENTERI MERANGKAP**  
**MENTERI PEMBANGUNAN WANITA, KELUARGA DAN**  
**MASYARAKAT**

Tuan Yang di-Pertua,

Polisi Perancangan Keluarga Kebangsaan yang digubal pada tahun 1966 menggariskan panduan bagi pelaksanaan dan penyelarasan program perancangan keluarga kebangsaan. Antara lain polisi berkenaan bertujuan menyediakan perkhidmatan perancangan keluarga bagi meningkatkan kualiti hidup dan kesejahteraan keluarga merangkumi aspek kesihatan dan taraf sosio-ekonomi wanita.

Perancangan keluarga bermaksud pasangan suami isteri merancang jumlah bilangan anak dan jarak kelahiran anak iaitu bila mahu hamil dan bagaimana menjarakkan kehamilan tersebut. **Ia bukan mengehadkan bilangan anak tetapi merupakan perancangan keluarga mengikut kemampuan sesebuah keluarga dari sudut kesihatan ibu, ekonomi dan sokongan penjagaan anak.**

Tuan Yang di-Pertua,

Kementerian melalui Lembaga Penduduk dan Pembangunan Keluarga Lembaga Penduduk dan Pembangunan Keluarga Negara (LPPKN) selaku agensi penyelaras program perancangan keluarga kebangsaan komited dalam usaha untuk menyediakan perkhidmatan sokongan keluarga termasuk aspek perancangan keluarga bagi membantu meningkatkan kesejahteraan sesebuah keluarga. Usaha-usaha berterusan juga giat dilaksanakan untuk meningkatkan penggunaan kaedah kontraseptif khususnya dalam kalangan wanita berisiko tinggi dan keluarga yang ingin merancang keluarga tetapi tidak mendapat akses kepada kaedah moden terutama di kawasan pedalaman.

Berikut adalah antara langkah-langkah yang diambil untuk meningkatkan kadar penggunaan kontraseptif ialah:

- (i) Meningkatkan pendidikan awal berkaitan perancang keluarga kepada pasangan yang bakal mendirikan rumah tangga. Dalam hal ini, LPPKN akan bekerjasama dengan pihak JAKIM untuk memasukkan topik perancang keluarga dalam kursus perkahwinan yang diwajibkan untuk semua pasangan beragama manakala bagi pasangan bukan islam penekanan

elemen perancang keluarga akan ditekankan di dalam kursus Pra Perkahwinan *Smart Start* yang dikendalikan oleh LPPKN.

- (ii) Memperkukuhkan mekanisme Dasar Perancang Keluarga Kebangsaan bagi memantau aktiviti perkhidmatan perancang keluarga dalam kalangan penyedia perkhidmatan (*service provider*) seperti Kementerian Kesihatan, *Federation of Reproductive Health Association of Malaysia* (FRHAM), Hospital Angkatan Tentera. Justeru, LPPKN akan memperkukuhkan Jawatankuasa Penasihat dan Penyelarasan bagi Kesihatan Reproduksi Kebangsaan (*Advisory and Coordinating Committee on Reproductive Health/ACCRH*) bagi menyelaraskan pengumpulan maklumat dan data perancang keluarga agar program dan aktiviti dapat disampaikan kepada kumpulan sasaran yang memerlukan.
- (iii) Memperluaskan aktiviti pendidikan dan promosi perancang secara *outreach* melalui Pusat Keluarga Bergerak yang dikendalikan oleh LPPKN dengan menyasarkan golongan miskin bandar dan di kawasan pedalaman. Sejak 2013 Sehingga Ogos 2018, seramai 339,833 wanita telah mendapat



perkhidmatan perancang keluarga kaedah moden dari perkhidmatan ini.

- (iv) Mengukuhkan kolaborasi bersama NGO dan agensi Kerajaan seperti JKM untuk melaksanakan aktiviti pendidikan bagi membantu klien dan pasangan mendapat khidmat nasihat berkenaan perancangan keluarga.

Tuan Yang di-Pertua

Jumlah atau kuantiti penduduk bukan faktor terpenting tetapi untuk melahirkan penduduk yang berkualiti berasaskan kepada institusi keluarga yang kukuh, stabil, harmoni dan sejahtera. **Dalam konteks ini, menggalakkan kaedah penggunaan kontraseptif dalam usaha mengurangkan isi rumah miskin adalah bertepatan dalam usaha melahirkan masyarakat yang berpengetahuan dan berkemahiran di samping menikmati tahap kualiti hidup yang baik** bagi mencapai matlamat negara maju dan berpendapatan tinggi. Bagaimanapun, **masyarakat mungkin akan mempertimbangkan untuk memiliki lebih anak sekiranya terdapat persekitaran ekonomi yang kondusif dan**

**sistem sokongan keluarga kukuh yang dapat memenuhi keperluan mereka.**

**PEMBERITAHU PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI BUNG MOKTAR BIN RADIN  
[ KINABATANGAN ]**

**TARIKH : 25 OKTOBER 2018 (KHAMIS)**

**SOALAN NO: 44**

Minta **MENTERI PENDIDIKAN** menyatakan bilakah YB Menteri berhasrat untuk melawat sekolah-sekolah daif di kawasan Parlimen Kinabatangan agar dapat melihat sendiri keadaan sekolah-sekolah daif ini dan seterusnya merancang untuk menaik taraf bangunan-bangunan sekolah tersebut.

**JAWAPAN**

Tuan Yang di-Pertua,

Untuk makluman Ahli Yang Berhormat, saya selaku Menteri Pendidikan pernah turun padang dan mengadakan beberapa siri lawatan kerja ke institusi pendidikan di negara ini. Antara aspek yang menjadi keutamaan saya ialah kemudahan dan prasarana pendidikan termasuk sekolah daif. Namun, tidak semestinya semua isu yang berkaitan dengan pembangunan pendidikan hanya akan dapat diselesaikan setelah saya sendiri turun ke lapangan. Saya percaya bahawa semua jabatan dan bahagian di bawah Kementerian Pendidikan Malaysia (KPM) sentiasa berusaha untuk memastikan pembangunan pendidikan berada dalam keadaan yang memuaskan.

Berhubung dengan sekolah-sekolah daif, KPM sentiasa memberi perhatian dan keutamaan kepada pembangunan pendidikan di Sabah dan Sarawak khususnya di sekolah-sekolah yang memerlukan kerja-kerja penyelenggaraan serta naik taraf kemudahan sekolah. KPM dari semasa ke semasa mengenal pasti sekolah atau bangunan sekolah yang perlu diselenggara dan dibaiki bagi memastikan sekolah mempunyai kemudahan pendidikan yang sempurna. Antara langkah yang diambil oleh KPM bagi menangani isu sekolah daif adalah dengan melakukan penyelenggaraan segera bagi sekolah yang mempunyai keperluan kritikal untuk pembaikan dan menaik taraf kemudahan infrastruktur dan menggantikan bangunan sekolah daif yang disahkan tidak selamat oleh pihak teknikal dengan bangunan baharu.

**Soalan No: 44**

Walau bagaimanapun, pelaksanaan kerja-kerja penyediaan pembangunan pendidikan yang diperlukan bergantung kepada peruntukan kewangan yang diterima dan kemampuan kewangan kerajaan.

Sekian, terima kasih.

RJM47

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA,**  
**PARLIMEN KEEMPAT BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : YB DATUK SERI PANGLIMA MADIUS  
TANGAU [TUARAN]**

**TARIKH : 25 OKTOBER 2018**  
**MENJAWAB**

**SOALAN : 45**

**YB DATUK SERI PANGLIMA MADIUS TANGAU [TUARAN]** minta **PERDANA MENTERI** menyatakan apakah langkah-langkah penting untuk mengembalikan status Sabah dan Sarawak sebagai *equal partner* dalam negara ini selaras dengan Perjanjian Malaysia 1963.

**JAWAPAN:      YB DATUK LIEW VUI KEONG**

**MENTERI DI JABATAN PERDANA MENTERI**

1.     Jemaah Menteri pada 5 September 2018 telah bersetuju untuk menubuhkan suatu Jawatankuasa Khas Kabinet untuk menyemak dan meneliti hak Kerajaan Negeri Sabah dan Kerajaan Negeri Sarawak di bawah Perjanjian Malaysia 1963. Terma rujukan bagi Jawatankuasa Khas Kabinet tersebut antaranya adalah untuk mengenal pasti dan menyemak isu berhubung dengan pelaksanaan hak-hak dan kuasa autonomi Kerajaan Negeri Sabah dan Kerajaan Negeri Sarawak berdasarkan Perlembagaan Persekutuan, Perjanjian Malaysia 1963 dan *Report of the Inter-Governmental Committee 1962* serta memperakukan syor berhubung dengan keperluan untuk memperbaharu kerangka perundangan.

2.     Jawatankuasa Khas Kabinet ini bertanggungjawab untuk meneliti dan mempertimbangkan apa-apa cadangan berhubung dengan hak Kerajaan Negeri Sabah dan Kerajaan Negeri Sarawak antaranya cadangan untuk mengembalikan status Kerajaan Negeri Sabah dan Kerajaan Negeri Sarawak sebagai rakan kongsi yang mempunyai sama taraf dalam pembentukan Persekutuan Malaysia, cadangan penggubalan suatu Perlembagaan baharu dan perkara-perkara lain yang berkaitan dengannya.

3.     Seterusnya, berkenaan dengan status pelaksanaan perkara di bawah *Devolution of Power* untuk Kerajaan Negeri Sabah dan Kerajaan Negeri Sarawak seperti yang telah dipersetujui sebelum ini, khasnya untuk mengembalikan kuasa perlombongan dan pengedaran

minyak dan gas kepada Sabah dan Sarawak, dan mengembalikan pemilikan dan pengurusan Sabah Electricity Sdn. Bhd. (SESB) kepada Kerajaan Negeri Sabah dan apa-apa perkara di bawah pelaksanaan *Devolution of Authority* kepada Kerajaan Negeri Sabah dan Kerajaan Negeri Sarawak boleh diteliti dan dipertimbangkan semula oleh Jawatankuasa Khas Kabinet ini memandangkan perkara ini merupakan keputusan dasar yang hendaklah diputuskan oleh Kerajaan yang memerintah pada masa kini.

Sekian, terima kasih.



**PARLIMEN MALAYSIA**  
**PEMBERITAHU PERTANYAAN DEWAN RAKYAT**

**PERTANYAAN : Lisan**

**DARIPADA : Tan Sri Noh bin Haji Omar**  
**[ Tanjong Karang ]**

**TARIKH : 25 Oktober 2018**

**SOALAN : Tan Sri Noh bin Haji Omar minta**  
**MENTERI PERTANIAN DAN INDUSTRI ASAS TANI** menyatakan  
berapa banyak jenis bantuan dan subsidi kepada petani, nelayan  
dan penternak yang telah dibatalkan oleh Kementerian.

**JAWAPAN**

**Tuan Yang Dipertua,**

Kementerian Pertanian dan Industri Asas Tani menyedari bahawa golongan petani, nelayan dan penternak di negara kita masih memerlukan bantuan daripada pihak Kerajaan untuk memperkasa pembangunan aktiviti sektor mereka. Justeru itu, sehingga kini, Kementerian masih meneruskan penyaluran subsidi dan bantuan yang sedia ada kepada kumpulan sasar tersebut dan belum berhasrat untuk membatalkan atau menamatkannya. Beberapa bantuan dan subsidi, misalnya subsidi kepada industri padi beras masih diperlukan dan diteruskan kerana industri ini merupakan industri yang amat penting bagi sekuriti makanan negara. Demikian juga pelbagai bentuk bantuan dan insentif kepada golongan petani lain, penternak dan nelayan seperti bantuan input baja dan racun, dan sarahidup masih diteruskan.

Namun demikian, menyedari bahawa berlakunya beberapa ketirisan dalam penyaluran bantuan selain kekangan kewangan yang dihadapi oleh Kerajaan masa kini, maka perlunya program bantuan serta kaedah pelaksanaannya dikaji semula untuk dilakukan penambahbaikan. Dalam industri padi beras misalnya, perlu ditingkatkan keberkesannya supaya produktiviti petani terus meningkat seperti melalui rasionalisasi subsidi baja dengan penggunaan formula yang betul mengikut kesesuaian tanah.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : TUAN AHMAD MARZUK BIN SHAARY  
[ PENGKALAN CHEPA]**

**TARIKH : 25/10/2018 ( KHAMIS)**

**SOALAN : 47**

Tuan Ahmad Marzuk bin Shaary (Pengkalan Chepa) minta **PERDANA MENTERI** menyatakan jumlah harta Jemaah Menteri dan keluarga mereka. Apakah Kerajaan juga bercadang untuk memperluaskan pengisytiharan harta kepada awam, melibatkan pegawai-pegawai Jemaah Menteri.

**JAWAPAN: YB DATUK LIEW VUI KEONG  
MENTERI DI JABATAN PERDANA MENTERI**

Tuan Yang di-Pertua,

1. YB Tuan Ahmad Marzuk bin Shaary bertanyakan jumlah harta anggota Jemaah Menteri dan keluarga mereka. Beliau juga turut bertanya tentang perancangan Kerajaan untuk memperluaskan pengisytiharan harta kepada awam, melibatkan pegawai-pegawai Jemaah Menteri. Saya memohon untuk **menjawab kedua-dua soalan ini bersekali** dengan satu soalan yang dikemukakan oleh Yang Berhormat Tuan Wong Chen berkenaan perisytiharan harta Ahli Parlimen pembangkang.

2. Anggota Pentadbiran dan Ahli-Ahli Parlimen di bawah Pakatan Harapan telah pun diarah untuk membuat perisytiharan harta melalui akuan bersumpah diserahkan kepada YAB Perdana Menteri dan disalinkan kepada pihak Suruhanjaya Pencegahan Rasuah Malaysia (SPRM). Perisytiharan harta ini merangkumi aset sendiri, pasangan dan anak-anak berumur 21 tahun ke bawah.

3. Kerajaan telah bersetuju supaya perisytiharan harta Anggota Pentadbiran dan Ahli-Ahli Parlimen dipaparkan di Portal SPRM mulai

pada 1 November 2018. Setakat 20 Oktober 2018, sejumlah 60 borang perisytiharan telah diserahkan kepada YAB Perdana Menteri dan sesalinan untuk SPRM.

4. Kerajaan juga telah bersetuju supaya perisytiharan harta ini turut dilaksanakan oleh pegawai-pegawai awam di pejabat Menteri dan Timbalan Menteri iaitu Setiausaha Politik, Setiausaha Sulit Kanan dan Setiausaha Sulit. Kerajaan komited untuk memastikan pelaksanaan arahan ini dibuat sebagaimana yang telah pun termaktub dalam Kod Etika Anggota Pentadbiran dan Ahli-ahli Parlimen Kerajaan.

5. Keseriusan Kerajaan untuk mewujudkan sistem governans yang baik dan telus telah dimulakan oleh Anggota Pentadbiran dan Ahli-Ahli Parlimen Kerajaan Pakatan Harapan yang mengisytiharkan harta mereka kepada YAB Perdana Menteri dan SPRM selepas PRU14. Justeru dasar yang baik ini akan diperluaskan kepada Ahli Parlimen pembangkang yang akan dilaksanakan oleh pihak Parlimen. Semua Ahli Parlimen tanpa mengira parti politik yang diwakilinya perlu mengisytiharkan harta bagi menunjukkan ketelusan dan komitmen ke arah negara bebas rasuah atau sebarang perlakuan jenayah yang lain.

6. Dalam hal ini, pihak Parlimen boleh mewujudkan satu peraturan untuk semua Ahli Parlimen termasuk pihak pembangkang mengisytiharkan harta kepada Yang di-Pertua Dewan Rakyat dan disalinkan kepada pihak SPRM. Ahli-ahli Parlimen pembangkang diharap akan menyahut seruan ini bagi menunjukkan komitmen ke arah kepemimpinan yang bebas rasuah dengan melaksanakan perisytiharan harta seperti yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI HAJI MUKHRIZ BIN TUN DR. MAHATHIR**  
**[JERLUN]**  
**TARIKH : 25 OKTOBER 2018 (KHAMIS)**

**SOALAN NO. 48**

**Y.B. DATO' SERI HAJI MUKHRIZ BIN TUN DR. MAHATHIR [ JERLUN ]** minta **MENTERI KEWANGAN** menyatakan insentif-insentif baharu kepada pelabur bagi memacu pembangunan dan pertumbuhan projek Zon Sempadan Khas Ekonomi atau Special Border Economic Zone, dengan izin, di Bukit Kayu Hitam Kedah.

**JAWAPAN**

Tuan Yang di-Pertua,

Untuk makluman Ahli Yang Berhormat, Kerajaan mengambil pendekatan untuk menggunakan insentif percukaian sedia ada bagi Zon Sempadan Khas Ekonomi atau *Special Border Economic Zone* (SBEZ), dengan izin, di Bukit Kayu Hitam Kedah. Antara insentif yang ditawarkan adalah pengecualian cukai pendapatan sebanyak 100% dengan tempoh sehingga 10 tahun, pengecualian duti import ke atas loji dan mesin, peralatan, alat ganti, bahan mentah dan komponen yang tidak dikeluarkan di dalam negara dan digunakan secara langsung di dalam aktiviti pengeluaran dan pengurangan 50% duti setem ke atas surat cara pindah milik atau pajakan tanah bagi tujuan pembangunan di Kedah dan Perlis. Sehubungan itu, Kerajaan berpandangan insentif yang sedia ada boleh dimanfaatkan untuk memacu pembangunan dan pertumbuhan SBEZ khususnya di dalam aktiviti perkilangan dan logistik.

Pada masa yang sama, kawasan Kota Perdana iaitu sebuah kawasan di dalam SBEZ telah diluluskan Zon Perdagangan dan Zon Perindustrian Bebas selaras dengan peruntukan di bawah seksyen 3(1) Akta Zon Bebas 1990. Jumlah peruntukan yang diperlukan bagi pelaksanaan peringkat awal projek ini adalah sebanyak RM25 juta bagi tujuan pembangunan *truck depot*. Di samping itu, satu kajian kemungkinan (*feasibility study*) bagi pembangunan Kota Perdana akan dilaksanakan bagi melihat keseluruhan pembangunan projek tersebut. Selain itu, kajian terperinci bagi cadangan pembinaan jajaran *Railway Spurline* yang akan menghubungkan Kota Perdana dengan jajaran landasan berkembar sedia ada akan turut dilaksanakan dengan anggaran kos sebanyak RM 5 juta.